

LIKEZAHALO LIBONAHALISWA

HANDE KA SIPOLOFITA

 Halu inamiseni litoho zaluna cwale kwa tapelo. Mulena luna Mulimu, Mubupi wa Lihalimu ni lifasi, Yana zusize Jesu hape kuzwa kwa bafu, mi wa pila ni luna kuzwa ka lilimo ze likiti zepeli ze, unza pila kamita kuli apake Linzwi la Hae ni ku Li eza kuba la niti kwa lusika kaufela. Lu itumezi hahulu kwa Pata ya Hae ye ya Bumulimu onafa cwale, ka kuziba cwana, kuli luna ni sepiso yetezi ye, kuli kasamulaho bupilo bo bu fela, luna ni Bupilo bwa Kuyakuile mwa lifasi le lina ni kutaha. Lu itumela ku Wena, ka se, Mulena. Mi ni sepo yani, ankora ya kwa moyo, ye swala hande ka tokomelo mi ya sephahaha mwa nako ya liñungwa. Mi ha kutaha liñungwa, mandinda amatuna a pikuluha, lu ikutwa kuli ka tumelo ku Yena lwa kona ku pahama lindinda kaufela.

² Mulimu, lutuse busihu bwa kacenu halunze lutaha ku to kutaza kwa bakuli ni ba batokwile. Lwa lapela, Mulimu, kuli kutokwe mutu ya kula mwahala luna ha lu ka zwa busihu bwa kacenu. Mi mutu kaufela hafoliswe ka Mata a Hao a Bumulimu, sibeli sa mo ni kwande mwahala naha, ku baba teeleeza ka mihala, kusike kwaba mutu ya fokola yaka zwela fande a muyaho kaufela kamba kopano ifi kaufela busihu bwa kacenu. Mi Moya wa Hao u ba folise. Tuhela kuli Lizazi lelituna la kuluka, ni foliso mwa mafufa a Hae, lipazule, luma mamonyi a tumelo mwa pilu kaufela habanze ba teeleeza kwa Linzwi, babone ponahazo ya Moya o Kenile kuba kolwisa kuli U sa pila. Lu lapela limbuyoti ze, Ndate, ka Libizo la Jesu. Amen.

Mwa kona kuina.

³ Kaniti lu talima kuli ki tohonolo yetuna fa kuba mo busihu bwa kacenu, hape, kwa—kwa kubulela kwa sicaba ni ku lapelela bakuli. Lu bata ku lumelisa bao kaufela babainzi kwande mwa na ha ya—ya mihala ya mawaile mwa na ha kamukana, hape busihu boo. Mi kacwalo lu lapela kuli Mulimu afuyole yomuñwi ni yomuñwi wa mina, ka kusepa kuli bao kamukana baba amuhezi Kreste kakusasana cwana baka kuliswa ka Moya o Kenile mi bipile ka ku sephahaha ni ka niti kamita ku Yena kufitela bupilo ha bu ta fela fa lifasi fa, ona bupilo bwa butu boo. Mi cwale bona, ka kueza cwalo, bana ni Bupilo Bobusafeli. Habana kushwa mwa lusika lo lu sa taha, kwa Lusika lolu tuna lo kaufela luna lu libelezi.

⁴ Cwale luka bulela kuli, ha Ni nze ni nahana ka zona, isiñi ku lyanganisa. Muzwale Vayle u kwanu, mi mwendi ha Ni koni

ku mu bona. Ni ka . . . Kana Ni yo ku lumela pampili yani ha Ni ka kutela kwa Tucson? Ni sweli kuibata bata, ha ni si ka ifeza kuibala kaufela yona pili, mi Ni ka ku lumela yona Ni sa fita fela kwa Tucson.

⁵ Cwale Ni bata ku fa zibiso yeñwi. Ye sihulu ki ya likeleke kai ni kai, sihulu kwa Wiko, kamba kai kaufela ko i bata kuli iye. Muzwale wa luna ya ishuwile, Muzwale Pearry Green, hamoho ni . . . Ki yena muzamaisi wa mihala ya mawaile a comekilwe a kwanu. Mulena ubile abeyanga fa pilu ya hae kuli atahange kuto lu potela kwanu kwa Tucson, ni kukala ancafazo kwa Tucson, ili ye lutokwa hahulu. Mi Muzwale Pearry ukaba mwa Tucson. Haiba mubata ku mu lumela, muye fela kwa ofisi ya luna kwani. Ikaba ka la 10 Muyana, la 11, la 12, ni 13. Ubile ni yona fa pilu ya hae fa nako yetelele, mi Ne ni mu bulelezi kuli “nzila fela inosi ya ku li zusa mwa pilu ya hao, ki kuya ni ku yo si eza.” Mi yena ki muzwale wa Mukreste, mutanga Mulimu wa niti. Mi mina sicaba, mwa Tucson, Na ziba mu ka fuyolwa haka be a kutaza kwani kokuñwi, mwendi ikaba kwa Ramada Inn kamba kaufela ko Mulena aka lukisa sibaka, ha si ka fita kale kwanu. Kono Na ziba mu ka fuyolwa ka kutaha, kuteeleza Muzwale Green hanze a shaela Linzwi la Mulimu ku luna, mwendi ki ku lapelela bakuli, kamba seo kaufela sesili mwa tozo ya Mulimu kuli aeze.

⁶ Hape lu bata ku itumela ku Muzwale Orman Neville, Muzwale Mann, ka nako yende ye ya ku kopana ni bona. Cwale Ni itumezi hahulu fa kuba, ni silikani ni muuna ya cwalo sina Muzwale Neville, Muzwale Mann, ni bakutazi babañwi ba kaufela kwanu. Na sepa ba zibahalisizwe. Haiba ha mu sika zibahalisa, ka katengo ka luna ni keleke kwanu, Ni sepa kuli Mulimu wa mi ziba kwanu kakuba batanga ba Hae. Mi Mulena ami fuyole kamita.

⁷ Cwale, Ne ni buzizwe taba yeñwi yenyinyani kwanu, fa kapepa nyana kene ka filwe ku na, ku . . . Ne ba nani mukopano wa basepahali busihu bo buñwi kwanu, kuba katengo ka basepahali ni madikoni, mi Na sepa litaba zene ñozwi ne li balilwe kakusasana wo fapila keleke. Ili, yani ki swanelo kuli lu eze cwalo. Mwa buketelo bo ne bu pangilwe ki ba katengo ka basepahali ni madikoni mo mwa keleke, ka niti, ha likoni kutabisa mutu kaufela. Halukoni kueza sani. Na hanina sa kueza ni ba katengo ka basepahali ni katengo ka madikoni. Hanina mane nihaiba boti konji hakuna ni tumelelano, mi Ni lukela kuba kwanu kuli ni eze cwalo ka nako yeo, Muzwale Orman Neville yena unga boti ya bubeli yani. Konakuli luna ni kunyatela ze, kakuli lu siemba sa keleke. Kono seo katengo ka basepahali ni buketelo bwa tutengo twani bo ba panga, luna lu yema kwa mulaho wa bona ka kutala luli, kakuli sani kona se ba bezi mo. Mi buketelo bwa bona bu mwahala bona ni Mulimu. Na hanikoni, hanikoni mi hanina kukona, ka mukwa kaufela, kulwanisa buketelo bwani. Mi taba yeñwi, Ni hanisizwe ki ba

Muuso wa United States kuli nisike na eza buketelo kaufela ka sani, kacwalo shangwe musike mwa ni kupa kuli ni sikulule buketelo bwa bona. Hanikoni kueza cwalo, mi hakuna se Ni ka utwa ka sona. Mwabona? Kacwalo musike mwa ni kupa kuli ni sikulula maikuto abona. Mu bone ba katengo, ki bona baba panga buketelo. Ku lukile.

⁸ Cwale mwa nako ya mukopano otaha, kwa konahala, haiba Mulena alata, Ni ka kutela kwanu mwendi mwa lisunda zene kuisa ku ze silezi, kamba sesiñwi sesi cwalo, mwendi kwa mukopano omuñwi wa la Sunda. Mi Ni zibahalize kakusasana cwana kuli ne Ni bata ku ambola fa kuli *Mulimu Uiponahaza Mwa Linzwi La Hae*, mi Hanina fela kuba ni nako busihu bwa kacenu, mi, kaniti, Hanina linzwi lelituna kuli ni eze cwalo. Mi cwale nyangela, kuna ni babañata kwande sina mo ku bezi mwahali, mi, mwendi ki babañata, kubala limbasi zani ni bimbayambaya bye binzi kwande kwani ni sicaba. Ba tukisize, ndu ya moya ipahamile nyana, lwa kona ku iutwa. Ona manzwi nyana a, manzwi nyana fa moya azwa kwa tabernakele, lwa kona ku teeleza sani fahule ka bima iliñwi. Mi limota zeñwi li fumaneha buhule bo bu likana ni bima iliñwi cwalo, muzamao ya mota, fa halimu nifafasi, ni kupotoloha ni mwahala mikwakwa, mwahala tabernakele busihu bwa kacenu. Ha ni lumeli kuli ka nako kaufela, ye bonahala, ye lukile lwaba ni sicaba se si ñata hahulu kupotoloha keleke sina halu na ni busihu bwa kacenu. Kacwalo luna lu... Mi babañata, babañata, babañata ba sweli fela ku zamaya ba kambama ni ku ikela.

⁹ Kacwalo si bonisa kuli, "Ko kuna ni Situpu, limbande li ka kopana." Mi Ni bulele ku mina busihu bo, mwa sikkwata nyana sa batu se, ki kopano ya linaha za kwande. Mo ku bonahalela kufitelela nyangela tuna luli ya katengo ka linaha ze liteni kwanu, kwanda linaha ze ketalizoho za kwande, mane ni kwa Russia, ni kwa libaka kaufela zeshutana za naha. Ku yo punya mane ni kwa Venezuela, hamoho ni kwa Jamaica, mwa libaka ze shutana kaufela za naha, sicaba siteni mo, bana ni tala ni kunyolelwa Mulimu. Ki nako ye kanya cwani!

¹⁰ Cwale Ni bata, kuli lusika bala kale Bibele, mi kikuli mu ka ni lapelela cwale. Ni—Nika lika kutisa Liñusa nyana, haiba Mulena alata, kuamana swanelo ya foliso ya Bumulimu. Kakuli, kakusasana cwana ne lu ambola fa puluso. Mi busihu bwa kacenu lu ka bulela fa mizuzu yelikani fa foliso ya Bumulimu, mi kipeto ni kubiza mukoloko wa ku lapelela sicaba. Halunze lueza cwana, kwande mwa libaka za mawaile, kaufela ko muinzi, neba kwande mwa limbasi ni limota mwa matuko, mwahala bima iliñwi kamba zepeli za tabernakele; ha se li nako ya ku lapelela bakuli, haiba ha mukoni kukena mwa muyaho... Kuli, ha mukoni, Na sepa cwale, kakuli minyako kaufela iminahani kusinana, itezi, mi hakuna sibaka kai kamba kai, kacwalo mu lapele ni kubeya mazoho ku yomuñwi ni yomuñwi kwande kafo.

Mi mukutazi kaufela ya lu teezeza mwa busihu bwa kacenu, hape lu lapelele kopano ya hae onafa sebelezo ya foliso hainze i zwelapili. Lu lumela kuli Mulimu uteni kai ni kai, kaufela kona. Cwale lusika bala kale kamba . . .

¹¹ Lusika be kale—kale ku lapela, lu bata kubala amañwi a Manzwi a Mulimu. Mi Ni cincize ma—ma Mañolo aka fa nako nyana, kakuli ka kubata ku cinca mufuta wa mukopano O Ni tomile mwa munahano wa ka busihu bwa kacenu, kacwalo Ni i cincize nyana ka bunyinyani; mi kacwalo Ni bile ni ku cinca Mañolo aka, isiñi ku acinca, kono ku abeya mwa muinelo omuñwi, ka foliso ya Bumulimu, ili kuli—kuli sicaba si utwisise.

Halu apuleñi ku Muñoli Luka, kauhanyo yabu 24. Mi luka kalela fa timana yabu 12 ya kauhanyo yabu 24, ni kubala ku shetumuka mwendi kupunya fa 34. Ki fa zuho ya Mulena Jesu.

Mi Pitrosi, azuha Pitrosi, mi amatela kwa libita; mi anangela fasasi, abona masila a line . . . inza komokile se ne si ezahalile.

Mi, amubone, bababeli ba kubona ne baya ka zazi leliswana kwa munzi o bizwa Emausi, buhule bwa ona ni kwa Jerusalema bu bata kulikana ni limaili ze sebene.

Cwale, si lwala liñokolwa ze lishumi kuli mupange—kupanga maili, kacwalo ne u likana ni limaili ze silezi.

Mi hane ba i kambolela ka . . . lika ze ne tahile.

. . . kwa ezahala kuli, bali, ba sa ambola hamoho ba buzana, Jesu yena luli a sutelela, a zamaya ni bona.

Kono meto abona na palelwa ku mu ziba.

Mi ali kubona, Ki zañi litaba ze mu ipulelela yomuñwi ni yomuñwi, mu nze muzamaya, mi mu swabile?

Mi alimuñwi wa bona, ya na bizwa Kleopa, a alaba ali ku yena, Kana ki wena ulinosi kwa baeñi ba mwa Jerusalema, ya sa zibi litaba ze tahile mwateni . . . mwa mazazi a?

Mi ki hali ku bona, Litaba mañi?

Cwale muhupule, yo ki Jesu Kasibili, uzuhile, wa bulela.

Mi ki ha bali ku yena, Kuama Jesu wa Nazareta, yanali mupolofita ya mata mwa likezo ni mwa linzwi fapila Mulimu ni batu kamukana:

. . . ka mo baprista ba batuna ni babusisi ba luna ne ba mufezi kwa . . . kuli a—kuli a atulelwe lifu, mi ba mu kokotezi.

Kono ne lu sepa kuli neli yena yana lukela ku liulula Isilaele: mi kwanda ze kaufela, kacenu ki lizazi la bulalu kuzwa fo ne ku ezahalezi litaba ze.

Luli, ni basali babañwi hape ba ku luna ba lu komokisize, bene ba pakezi mwa libita;

Mi ha ne ba si ka fumana mubili wa hae, ne ba tile, ba bulezi, kuli ne ba boni pono ya mangelozi, ana bulezi kuli... na pila.

Mi babañwi ba kubona bene bali ni luna kwa libita, mi ba fumani kuli ku cwalo mo ne ba bulelezi basali: kono yena haba si ka mubona.

Muteeleze cwale; Jesu.

Mi ki hali ku bona, Mina likuba, . . . ba lipilu ze liyeha ku lumela litaba kaufela ze bulezwi ki bapolofita:

Hanili Kreste na lukela ku nyandiswa mwa lika ze, mi akene mwa kanya ya hae?

Mi ku kalela ka Mushe ni bapolofita kaufela, aba tatululela litaba kaufela, mwa mañolo kaufela lika za bulezwi ka zona.

Mi ba sutelelela kwa munzi, kone baya: mi aeza inge kuli wa fitelela.

Kono ba mu tundamena, bali, Ina ni luna: kakuli seli bukaifi ni manzibwana, mi lizazi se li likezi. Mi ki ha kena aina ni bona.

Mi kwa ezahala kuli, ha na inzi fa tafule ni bona, anga sinkwa, mi a fuyola, ni ku si komauna, mi a sifa ku bona.

Mi meto abona a kwaluha, mi ba mu ziba; mi ba likelelwa ki yena.

Mi se bali yomuñwi ku yomuñwi, Kana lipilu za luna ne li sa tuki, hana sweli kubulela ni luna mwa nzila, ni ha na sweli kukwalula ku luna mañolo?

Mi ba nanuha ka hola ye swana, ba kutela kwa Jerusalema, mi ba fumana baba lishumi ka alimuñwi ba kopani hamoho, mi hane bali ni bona,

Bali, Mulena uzuhile kaniti, mi u iponahalize ku Simoni.

Mi ba bulela lika zene ezahalile mwa nzila, mi ni ka mwa na itibahalize kubona ka ku komauna sinkwa.

¹² Cwale halu lapeleni. Ndate yomunde ya musa, lwa itumela ku Wena ka Linzwi la Hao, kakuli Linzwi la Hao kona Niti, Linzwi la Hao ki Bupilo. Mi Wena, O Mulena, mi Linzwi la Hao ki nto Ililiñwi. Kacwalo lwa lapela busihu bo, Mulena, kuli Utahé mwahala luna mwa mata a zuho ya Hao mi ubonise ku luna busihu bwa kacenu, sina bani bene bazwa kwa Emausi, kuli ni luna hape lu kutele kwa malapa aluna, lunze luli, "Kana lipilu zaluna ne li sa tuki mwahala luna?" Lumeleza cwalo, Mulena, seli bukaifi ni nako ya manzibwana hape. Kakuli lwa likupa ka Libizo la Jesu. Amen.

¹³ Cwale Ni bata kubulela kuamana ni Bibele ye. Mi tuto yaka busihu bo, ka toho ya taba, kikuli: *Likezahalo Libonahaliswa Hande Ka Sipolofita. Likezahalo Libonahaliswa Hande Ka Sipolofita.*

¹⁴ Cwale, Bibele ki Buka ye shutana kuzwa kwa libuka kaufela ze kenile. Bibele ki Buka ye shutana. Ki Buka ya sipolofita, ye bulela likezahalo ze sa taha. Mi hape Ki Sinulo ya Jesu Kreste. Kutaha cwalo kuzwa mwa Genese kuisa Sinulo, ya Mu tisa ka kutala kwa Hae, sa Na li sona ni seo ali sona. Mi Buka kaufela ka kutala, Sinulo 1:1 kuisa 3, iize Buka yateni ki Buka ya “Sinulo ya Jesu Kreste,” yeli Linzwi la Mulimu. “Sinulo ya Jesu Kreste,” lona Linzwi la Mulimu!

¹⁵ Cwale, libuka zeñwi kamukana, libuka ze kenile, ki libuka fela za ku ikuteka, litaba za buiswalo, kamba litaba za lituto za bulapeli. Sesiñwi sakuli...Ki babakai babakile ba bala Koran, yona Bibele ya ba Mohammad, mi—mi ni buka ya kaza bu Buddha, ni zeñwi cwalo? Ki buka fela ya litaba za ku ikuteka, seo batu balukela kupila, mo ba lukela kupilela, kono ha ipolofiti, ha i buleli lika kaufela ka lika ze kamba ka limpo kaufela zende ze fiwa ku mutu kaufela, sika kaufela se si lukela ku ezahala. Kuswana fela sina kukena mwa sibaka sa kulobala kamba sesiñwi. Kabakaleo, likeleke li sa taha fela fa sibaka sakuli ba eza keleke ya bona sina ndu ya kulobala ni kukena ku yona, kipeto ba wile kuzwa mwa Linzwi la Mulimu.

¹⁶ Kakuli Bibele ki bupilo, bupaki bwa Jesu Kreste bo bu bulezwi. Mi sina lifasi ha li hulile mwa mutalelela wa lona, mi hape mitai ihula kuba ye mituna, lizazi lihula kutaha mwa kutala kwa lona, Bibele nei bonahalile mwa mutalelela wa Yona ku Mutu wa Jesu Kreste. Nali yena Linzwi la Mulimu leli patuluzwi, yona Buka yetezi ya Kuliululwa. Bibele ki Linzwi la Mulimu, ibulela litaba ze taha kwa pata. Balumeli ba yona ba laelwa ki Muñaa Yona kubala ni ku lumela Linzwi kaufela la Yona, isiñi fela siemba sa Yona. Linzwi Lililiñwi, kutokwa ku Li lumela, mwakona kuitulela kulika kufitela mulumela Linzwi lani. Linzwi kaufela kaniti ki siemba sa Mulimu Yamata; Mulimu ya iponahalize, ku felela mwa Linzwi la Hae, ku bonisa Yo ali Yena. Lu laezwi, kakuba balumeli, ku lumela Linzwi kaufela la Yona. Mi Iñozwi ki Muñi yena Mulimu Kasibili. Hakuna mutu yakona ku ekeza sika ku Yona kamba kuzusa sika ku Yona. Haiba ne mu ka eza, ikona kuba mubili o fokola wa Mulimu. Ne ku kaba, mwendi sina minwana ye silezi kwa lizoho lililiñwi, kamba—kamba mazoho amalalu, kamba sesiñwi, ku ekeza sesiñwi, kuzusa sesiñwi ku lona ni kutokwa lizoho lililiñwi, munwana ulimuñwi uli siyo. Ki Mubili o tezi wa Jesu Kreste. Mi ku Kreste, kakuba kuli ki Muuna, yena Munyali, Munyaliwa upakiwa ku Yena hape. Mi bababeli ba ki Alimuñwi. “Ka lizazi lani mu ka ziba kuli Ni inzi ku Ndate, mi Ndate u ku Na, Na ku mina ni mina ku Na.” Ki siswaniso kwa kutala cwani!

¹⁷ Mi balumeli ba niti mwa Linzwi le, baba ka Li amuhela ka nzila yani, ku Li lumela, mi ka tibelelo ba libelela lisepiso za Lona ze sepisizwe, yeñwi ni yeñwi ya zona kuli ibonahale mwa lusika lwa yona. Mulumeli kaufela ubile ali libelela. Mulumeli kaufela yabile fa minwana ya mautu, utalimezi, ki yena ko li patululezwi.

¹⁸ Cwale mutualime mwa mazazi a kutaha kwa Mulena Jesu. Ki kabakalañi batu bani hane ba si ka lemuha Joani, kanti Bibele nei bulezi patalaza ka Isaya kuli, “Kukaba linzwi la ya huweleza mwa lihalaupa lakuli, ‘Mulukise nzila ya Mulena’”? Mupolofita wa bona wa mafelelezo yene banani, yeli Malaki 3, naize, “Amubone, Ni luma numwana wa Ka fapila pata ya Ka kuli alukise nzila.” Kiñi hane ba sika ibona? Kakuli neba talima fa sika sene si ezizwe, kutoma tumelo yabona fa liñusa leliñwi lene li bulezwi kwa mulaho, mi ba palelwa kubona ponahazo ya Mulimu mwa lizazi lene ba pila ku lona.

¹⁹ Mi Bakreste, kai ni kai, fani kona fo ku yemi lifasi luli kacenu busihu bo. Kusina ku kanana, yani kona niti! Bakreste, kai ni kai, balika kutilima kwa mulaho kwa litaba za ku ikuteka sina Bo Luther hane bañozi, kamba Bo Wesley, Sankey, Finney, Knox, Calvin; ili, bao hakuna ni yomukana wa luna yakona kubulela bumaswe ka bona, kono sani ne li sa lizazi le li fitile.

²⁰ Bafalisi ne ba talimile kwa mulaho kubona sa na bulezi Mushe, mi ki ha bali, “Luna ni Mushe. Ha lu zibi Wena ko zwelela.”

²¹ Kono muhupule, fani Mushe fa, ne ba sa zibi kwa na zwelela. Mwabona? Mi cwale bona . . . Ki kabakaleo Jesu naize ku bona, “Mina mukabisa mabita a bapolofita, mi ki mina mu ba beile mwahali mwani.” Kasamulaho Liñusa la bona lifela! Liñusa la taha, batu ba Li bona, ba Li keshebisa (lifasi laeza cwalo). Mi cwale kasamulaho numwana amana kuya ni Liñusa lifela, konakuli ba yaha kopano fahalimwa Liñusa. Mi fani ba shwa, ona fani, mi haba sa taha kwa Bupilo hape.

²² Mutualime fa nako fela, ku mina babañwi sicaba, mi sihulu Ni bulela ku mina sicaba sa Katolika. Kana mu lemuhile, kikuli mukile mwa bala litaba za kale za niti, ona litaba za kale za keleke ya Roma ya Katolika? Kuli kwa litaba za ba bulaiwa, kukala ka Muhalalehi Augustine wa kwa Hippo, ki bo lule babakai baba sina mulatu bao keleke nei bulaile! Ni libezi, hanikoni kubulela nombolo ya teni ka swanelo, kono i pahami mwahala bo lule lule, kukala ka Muhalalehi Hippo wa . . . Muhalalehi Augustine wa kwa Hip . . . wa kwa Hippo, Africa, na zibahalize kuli luli neli tato ya Mulimu ku bulaya mutu kaufela yana lwanissa keleke ya Katolika ya Roma. Kana mwa lemuha kuli mwahali mwani, kuli Muhalalehi Patrick na si ka lemuhiwa konji kasamulaho wa lifu la hae, kakuba mu Katolika wa Roma? Na lwanisize popu ni likezo za hae kaufela,

mi keleke ya Katolika yona kasibili ya bulaya mashumi a likiti a bana ba hae. Kana mwa ziba kuli keleke ya Katolika ne icisize Joan wa kwa Arc, yena musali ya kenile yomunyinyani yani, kwa musumo, kuli kube-...neba ize kuli ki muloi. Lilimo ze mianda ye mibeli kasamulaho, ba kata mibili ya baprista, hane ba fumani kuli ne ku fosahalile, ni ku inepela mwa liwate, kusina ku ba pumbeka mwa mubu o kenile, kuli ba bake.

Musike mwa tuhela lizazi lifite fa litoho za mina, ni kuba likuba.

²³ Kamo baprista bani neba ka latela, busihu bwa kacenu, kuli batahe, bani bene ba nyazize Jesu. Taba fela, neba si ka bona kale zene bulezwi za hola yani. Kambe neba ka...Jesu naize, "Mubale Mañolo, kakuli ku Ona mu nahana kuli," kamba, nitaluse, "muipapata kuli muna ni Bupilo Bobusafeli, mi Mañolo kona a mi bulelala Yo nili Yena," a hola yani.

²⁴ Mulemuhe, Bibebe haikoni ku palelwa. Kona nto iliñwi ye I sa koni kueza, lona Linzwi la Mulimu, kupalelwa, kakuli I bulela likezo za Muñaa Yona Asika lieza kale.

²⁵ Cwale, kuna ni kolo iliñwi mwahala linako ze likiti kuli mutu wa kona kubulela taba yakuli sesiñwi si ka ezahala, mi sa kona ku ezahala. Kono he haiba uka bulela *ko* sika ezahalela, sani si ka mu beya mwendi mwa kolo iliñwi kuzwa ku ze likiti ze lishumi. Haiba ubulela *lizazi* le si ka ezahala, sani sa kusufalafafasi, kolo iliñwi kuzwa ku ze lule. Mi *yo* si ka ezahalela ku yena, sani si tahafafasi ka kolo mwahala ma bilioni.

²⁶ Kono Bibebe ye ya mi bulelala hande *mañi, lili, kai*, ni *sa* ku libelela, mi yali kuba ipalelwe nihaiba nako iliñwi. Kabakaleo, mwa ngambolo nyana ha ki kale hahulu, ni muprisita wa keleke yebizwa Sacred Heart ona kwanu; na ize, "Bo Branham, mulika ku kananisa Bibebe." Ali, "Zani ki litaba za kale za keleke."

Se nili, "Ha ki litaba za kale. Ki Mulimu, Yena kasibili, mwa muñolo."

Ki hali, "Mulimu umwa keleke ya Hae."

²⁷ Se nili, "Mulimu umwa Linzwi. Mi sika kaufela se si shutana ku Lona, si be buhata. Kakuli Na ize kuli, 'Linzwi la Ka libe la niti mi linzwi la mutu kaufela libe buhata.'"

Yena ali, "Halu lukeli ku kanana."

²⁸ Se nili, "Hani sika ku kupa kuli ukanané, kono Bibebe i bulezi kuli, 'Amutahe, lu ikambote hamoho.'"

²⁹ I bulela likezo za Muñaa yona Asika li eza kale. Kabakaleo, kubulela kuli, konakuli sani si beya muuna kaufela ni musali, fa Museto wa Katulo, kusina buinyazo ni bobukana. Haiba munga se ba bulela ba Methodist ka Yona, se ba bulela ba Baptist ka Yona, se ba bulela ba Katolika, se ba bulela ba Pentekota, kamba keleke yenñwi kaufela, mwakona kufumana ku swabiswa kokuñwi ka la Katulo. Kono haiba mu ka talima fela seo Bibebe

ibulela kuli si ka ezahala, mi ha ku ezahala, konakuli mu ka lemuha se si ezahala.

³⁰ Cwale, ha si sika taha patalaza kuli batu kaufela ba kone kubona, kakuli Jesu na lumbile Mulimu ka ku lipatela meto a baba butali ni ba ngana, mi ni ku li patulula kwa limbututu ze kona kuituta. Munahane ka za Mulimu Yamata kaufela haina mwa Linzwi la Hae Tota, ka mata ku foufaza bafumi ni baba bundume ni—ni baituti baba cuukile, ku foufaza meto abona kuli basike ba Mu bona, mi akwalula meto a ba botana ni litimbi.

³¹ Mulemuhe batu bene bazwa kwa Emausi ba, Na ize kutwisiso yabona—yabona ka Yena ne ikwalilwe. Ne ba ambola ku Yena mi mane ne ba sa zibi kuli Nali mañi, musihali kaufela. Mulimu wa kona kueza cwalo, kakuli Ki Mulimu.

³² Sani luli sa Na ezize kwa baprista bani, bañoli bani, kakuli Ne ku ñozwi kuli Na nani kueza cwalo. Mulimu na foufalize meto a bona ili kuli lube ni kolo. Mulemuhe, ne ba si ka bona, hakuna taba kamba neli baituti baba cwani, kamba nebali baprista baba cwani, se ne ba ezize, niteni ne ba sika Si bona, kakuli nebali libofu. Meto abona hakulata nali twenty-twenty, ka butu. Kono meto abona a moyo!

³³ Taba yeswana Ne ni lika kuambola kakusasana cwana ka za buhule bwa basali, kutina ka mukwa obatina ka ona cwale. Ki mahule. Mwa Buka ya Mulimu bana ni mulatu wa boozwa ka nako kaufela ye ba apala litino za butanya. Mioya ya bona, haba li zibi. Na ba lumela basali bani, buñata bwa bona, likiti za bona, habana mulatu, mi ka mukwa kaufela habakoni kueza boozwa. Mi basali baba shebile, ni yomuñwi ya ka ba tuhelela kuzwelapili ni zona, kusina ku litisa fa ngandaleza ni ku bulela niti, kueza boozwa. Ili, fo Bibebe i bulezi kuli, “Lihule lene liinzi fa mezi amañata, kuli malena lifasi kaufela ni batu ba lifasi, likeleke ni zeñwi cwalo, ne ba ezize buhule bwa moyo ni yena. Mi musali yani nali YENA MAHE WA MAHULE,” likopano.

³⁴ Mutualime Bibebe, kakuli Mulimu ha lu siyangi mwa lififi. Na lumile Bibebe kuli ilubulelele likezahalo za kwapili lisika ezahala kale, ni sibupeho luli ni nako ye ne lika taha.

³⁵ Cwale, ki nto yeñwi sina kutalima fa kalenda ni kubona kuli ki lizazi mañi. Haiba mu nahana, kuli le kona la Pelekelo le, la Sunda, ki sikamañi sani? Mutualime fa kalenda. Kalenda ika mi bulelala kuli ki lizazi mañi. Ha mu ka bona likezo za batu, mwendi bayanga kwa keleke, mwa bona li—li...kuutwa milangu ha i lila, mu ka komoka kuli ki zazi mañi. Mutualime fa kalenda, ika mi bulelala kuli ki lizazi mañi.

³⁶ Mi ha mubona keleke haikala kuba ya lifasi, sina mo ne i inezi mwa mazazi a Sodoma, kubona lifasi la keleke kaufela lona liya mwa...ku lapela “mulimu wa lusika lolu maswe lo,” ni kubona sani; mi ni kubona sikuwata nyana hasi kopana mwatasa susumezo ya Mulimu, haitisa hape Bupilo bwa Jesu Kreste, ka

Mañolo ze lukela ku ezahala, mu ziba kuli ki nako mañi ye mupila ku yona.

³⁷ Bibebe ye ya bulela za kwapili, ka siponofita, kuli ki lizazi mañi le lupila ku lona, ni kuli ki nako mañi ye lu pila ku yona, mi ki mufuta mañi wa likezahalo ze lukela ku ezahala. Ya li bulela hande kuya ka litaku za teni, mi haisika mbunja nihaiba lusika lolukana, nako kaufela. Ha ku sikaba kale nako fo likile La palelwa, mi ha Lina kupalelwa, kakuli baba lukiselizwe ku li bona ba ka li bona. Jesu naize, “Hakuna mutu yakona kutaha ku Na, kwanda kuli Ndate Yena luli amubize, mi bao kaufela Ndate a Ni file baka taha.” Ki Linzwi leli kopana ni Linzwi. Halikoni kueza taba isili fela. Lwa ziba cwalo, lizazi le lupila ku lona.

³⁸ Kono sina hakubile mwa lusika ni lusika, sicaba si tuhela kuli batu ba beye toloko ya bona bañi kwa Linzwi le, ni kuba eza kuli ba foufale kwa likezahalo ze ezahala. Taba yeswana yene ezahalile kwa Bafalisi ni Basaduki. Mane nihaiba Paulusi hana yemi fani ni kulika kubulela Mañolo, mi muuna yomuñwi amunata mwa pata kakuli na bizize muprisita yomutuna kuli toho ya mafata. Mi kipeto ba palelwa kubona Mulimu inza paka Linzwi la Hae.

³⁹ Mwabona, Bibebe ha iitwanisi Ili yona; Bibebe ki Mulimu. Hakuna ku itwanisa ku Mulimu; Yena u petehile.

⁴⁰ Kono haili sicaba, ka toloko yabona bañi! Cwale mulemuhe, mutuhele ni mi bonise, balikani. Likeleke halikoni ku lumelelana zona liñi fa ‘mutolokelo wa Yona. Ba Methodist habakoni ku lumelelana ni ba Baptist, ba Baptist ba Presbyterian, ba Presbyterian ba Pentekota. Mi ni ka likopano ze mashumi amane ze shutana za ba Pentekota, habakoni ku lumelelana yomuñwi ni yomuñwi. Kacwalo mwa bona, sani sikona kuba Babilona hape, kulyangana.

⁴¹ Kono Mulimu Wa ikezezanga toloko ya Hae ya Linzwi la Hae. Na sepisize taba ye, mi kipeto wa ieza Yena kasibili. Wa fa, Yena kasibili, toloko ya yona, kakuli Wa ikeza Iliyena ku zibahala mwa hola yani. Mubili wa—wa Kreste mo u pahamezi, kuzwa kwa mautu kuya kwa toho!

⁴² Mulemuhe, kacwalo lani kona libaka leo batu ha bapalelwa ku utwisia, kakuli ba teezea ku sa bulela mutu yomuñwi ka Sona, mwa sibaka sa kubala Linzwi sina Jesu hana ba bulelezi kueza cwalo, “Mi ki Ona A paka za Ka. Mubale Mañolo, ku Ona muhupula kuli muna ni Bupilo Bobusafeli, mi Ki Ona apaka za Ka.” Mwa manzwi amañwi, muiteeleze, “Sikamañi? Mubale Mañolo ni kubona seo Mesia na lukela kueza. Mubone nako ya na lukela kutaha Mesia ka yona. Mutualime ya na ka eteleta Mesia. Mutualime fa hola. Mi ku lukela kuba linzwi la yomuñwi ya huweleza mwa lihalupa, Joani. Mi muezize ku yena ona cwalo mo ne mu latela. Mutualime se ne Ni lukela kueza ha Ni taha. Mi

cwale ki sikamañi se mu ezize? Kana Ni palezwi ku eza Sakuli?” Mwabona, Jesu wa bulela, “Kana Ni palezwi ku eza Sakuli?”

⁴³ Mulemuhe, halunze lutaha lu shetumuka cwalo mwa Mañolo musihali wo, kuli lika kaufela zene polofitilwe ka Yena ne li ezahalile ona cwalo mo ne li lukela kubela. Neba lukela kuziba taba tuna ye. “Yena Muika, wa sanana ya na tile yo, wa lilimo ze mashumi amalalu ka zetalu a kupepwa . . . kamba lilimo ze mashumi amalalu, mi aya kwani ku yo lamulela mifuta kaufela ya Liseli, ni Linkwilimba linze li kambama. Mi, kiñi, neli fela li—li lishwau.” Ne ba ize, “Na pepilwe ki bashemi ba bunyazi, uipapata kuli U pepilwe ki mwalyanjo.”

⁴⁴ Kana ne ba sa lukeli kuziba kuli Isaya na bulezi kuli, mwa Isaya 9:6, “Ku luna Mwana upepilwe”? Kana hape ne ba sa lukeli kuziba kuli mupolofita Isaya nabulezi kuli, “Mwalyanjo uka itwala”? Ne ba lukela kuziba lika zani. Kono, mwa bona, taba yateni neli kuli, ne ba si beya kwa sibaka sa kwapili. Mi Muuna yo, ku bona, na si ka fita fo ne ba kulubela. Kono Na ba kupile kuli, “Mubale Mañolo, kakuli mu nahana kuli ku Ona muna ni Bupilo Bobusafeli, mi Kona Litaba luli ze paka kwa Liñusa la Ka.” Isiñi sa bulezi muituti yomuñwi wa lituto za bulapeli; kono seo Mulimu, Linzwi la Hae Tota, se libulezi kuli si ka ezahala! Amen!

⁴⁵ Ku cwalo ni kacenu! Mubale Mañolo, kakuli ki Ona Luli alu bulelela hola ye lupila ku yona, alu tolokela hande se si ka ezahala mwa lizazi le. Ki Ona o mu lukela ku itinga ku ona, kakuli ki Ona a paka Mutu wa Jesu Kreste. Kakuli Bibebe i bulezi, kuli, “Yena wa swana maabani, kacenu, ni kuyakuile,” kakuli ki Yena sinulo ya Linzwi mwa lusika. Hakoni kuba ya shutana.

⁴⁶ Kabakaleo ka kuteeleza kwa toloko ya mutu, ba bona tiisezo ya Linzwi la Mulimu ha i talelezwa, bapalelwa ku I bona. Kakuli, ya ezahala ka nako kaufela, kono kakuli ba teeleza . . . Mi Jesu nabulezi kuli, “Ki baeteleli ba libofu.” Mi haiba sibofu si etelela sibofu, ki sikamañi se si ka ezahala ku bona? Cwale muhupule, Bibebe ne i bulezi kuli lusika lo lwa bulapeli Lusika lo lwa Laodesia neli bwa bubofu. Ne ba Mubeile kwande a keleke. Hakuna lusika lusili, lusika lwa keleke loluñwi, ko Jesu nali kwande. Kono konji mwa Lusika lwa Keleke ya Laodesia, Nali kwande, ulika kukutela mwahali, “Ni yemi fa munyako na ngongota.” Ulukela kuba mwahali. Kono Na bulezi kuli, “Kakuli u bulela kuli, ‘Ni fumile, ni atezwi ki lika, hanina ze ni tokwa,’ mi ha u zibi, ha u zibi kuli u sibofu, ku zamaisa libofu, ushebile mwa moyo, mubotana, unyandile, mapunu, mi ha u zibi.” Ki kulyangana . . . Haiba mutu uinzi mapunu fa mukwakwa, unyandile, sibofu, mi uziba kuli una ni ngana kuli ne mu ka mubulelala kuli uinzi mapunu, na ka lika kueza sesiñwi ka sona. Kono ha nyanganyisa toho ya hae, kuli, “Hanina kuba ni Sona. Ki wena mañi kuli uni bulelele sa kueza? Na ziba fo

Ni yemi.” Cwale, haiba sani ha ki sibupeho se si utwisa makeke, Hani zibi. Mi sani ki sona ona cwalo sa bulezi Mulimu wa Bibebe ye kuli keleke ikaba cwalo, mwa lusika lolu maswe lo ona fa, mwa lusika lwa keleke ya mafelelezo mo na mo lu pila.

⁴⁷ Mulemuhe, kono kwa batu, “Bona bo Ni lata, Na kalimela.” Cwale, haiba mu kalimelwa ki Mulena, ka se mueza, kona kuli muzwe ku sona he! Musabe ku sona. “Bona bo Ni lata, Na kalimela.”

⁴⁸ Cwale, kubona Mulimu, cwale, kucwani haiba Bafalisi bani ne ba kali, “Libelela fa muzuzu. Muuna yani ulufile butata nyana, Na bulezi kuli, ‘Mubale Mañolo, kakuli ku Ona mu nahana kuli muna ni Bupilo Bobusafeli; A paka za Ka.’ Ku hande kuli Ni talime mwa Mañolo ni kufumana Sa lukela kueza, Yo ali Yena, se si lukela ku ezahala. Ni lukela kutalima kwa mulaho ni ku batisisa”? Mwa sibaka sa kueza cwalo, ne baile kwa baprista ni ku ba buza, “Kucwani ka Sona?” Mwabona shutano kana? Ne ba lukela ku balanga Linzwi.

⁴⁹ Mwa Maheberu 1:1, Bibebe i bulezi kuli, “Mulimu, mwa linako za kale,” mwani ki mwa, “linako za kale ni mwa mikwa yemiñata na ñozi Bibebe ka bapolofita.” Cwale mulemuhe, Na ñozi Bibebe ka nzila ya Hae Luli ye ketilwe. Mwabona? Cwale, Na sa lukeli ku I ñola ka nzila yani, kamba mane Na sa lukeli kupilisa mutu ka Mali. Na sa lukeli kukutaza Evangeli ka mutu; Na ka tuhelela lizazi kamba kweli kamba linaleli kukutaza Evangeli, Na ka tuhela kuli moyu u shaele Evangeli. Kono Na ketile mutu! Mi Na ketile nzila ya mo Linzwi la Hae ne litezi, mi sani neli ka bapolofita ba Hae bene ba lukisizwe ni ku lemuhiwa kale, kuba siemba sa Linzwi la Mulimu, kubulela sinulo ya Linzwi la Hae kwa lusika lwani ni nako yani. “Kakuli Linzwi la Mulimu ne litile kwa bapolofita fela.” Lona ha Li tahangi ku muituti wa litaba za bulapeli. Mu ni bonise Liñolo. Li tahanga fela kwa bapolofita. Mulimu hakoni kupuma. Kacwalo Mulimu na ñozi Bibebe ka mukwa wa Hae o ketilwe, ni bapolofita ba Hae Luli baba ketilwe; isiní bapolofita bana ketile mutu, kono ki bapolofita bana ketile Mulimu.

⁵⁰ Konakuli balumeli ba Yona ba ka libelela kutalelezwa kwa se ba bulezi bapolofita ba bona, mi yani kona zibahaza yakuli ki bapolofita ba Mulimu. Kakuli, pili, ba susumelizwe. Sesi tatama, ba pila ka swanelo ni Linzwi la hola. Konakuli zani kona linepo za hae. Mwabona, ne lu fitile ku zani la Sunda lelifelile. Bapolofita babañata ba ka taha. Mi ne lufile taluso ya kamo Balami ni Mushe, sibeli sa bona ne ba tozizwe ka Moya o swana, alimuñwi wa bona ali, “Luna kaufela lu balibañwi. Halu taheni lu kopane, kubeya basizana ba luna ni bao kaufela hamoho. Luna ni basizana babande kwanu, ni mina bashimani amutahe kwanu mu i kungele mufumahali yomunde. Zani li lukile, luna kaufela lu batu ba libañwi, nihakulicwalo, lusika lolu swana.” Mulimu na si ka ba swalela ka zona. Ne ba teelelize ku sani.

⁵¹ Mwabona, lifasi ni—ni sicaba ba talimezi kwa ku zwela, tu nzila totuñwi twa kufita, twa mapumela kaufi, kono hakuna mapumela kaufi mwa Linzwi la Mulimu. Kuna ni Mukwa ulimuñwi. Mu lukela ku itemuha mina bañi kuli mukwane mwa Mukwa wani, musike kulika kupuma Mukwa o ka mi likana. Mutu kaufela ulukela kueza cwalo. Wani kona fela mukwa wa Mulimu wa kueza lika ka ona.

⁵² Mulemuhe cwale, balumeli ba libeleta Linzwi lani kuli li pakiwe. Mwabona, Ne li sika ñolwa ki mutu, kono ka Mulena Mulimu, kabakaleo ha Ki buka ya mutu.

⁵³ Yomuñwi naize, “Ki litaba fela zeñwi ze ñozwi za si Heberu.” Kana Maheberu ne ba ka ñola liñolo lene li ka ba nyaza isali bona? Kana naha yende yani ya Majuda, ya mufuta wa yona mi ye bukwala, kikuli ne ba ka ñola bumaswe bwa bona bañi, ku inyaza isali bona bañi? Kaniti kutokwa. Ku ipulela libi za bona bañi, mo ne ba kenezi mwa milapelo ya balimu, mo ne ba ezelize boozwa kulwanisa Linzwi la Mulimu? Batili, batili. Ne ba si ke ba bulela zani, ona naha ya muikuhumuso yani.

⁵⁴ Ha ki buka ya mutu. Ki Buka ya Mulimu. Mi mutu ya bonanga lipono kamba kuutwa Linzwi la Mulimu, na si ka liutwisisa (linako zeñata) ni yena, mwa litaba zeñata. Mwabona? Mutu na si ka ñola Bibebe. Ki Mulimu yana ñozi Bibebe. Ha ki... Ha ki buka ya mutu. Ki Buka ya Mulimu. Ki mihupulo ya Mulimu ye bulezwi ka milomo ya butu. Sani kona se si I panga kuba Bibebe. Muhupulo ha ubulelwa uba linzwi. Mi kwa simuluhu ne ku na ni Munahano wa Mulimu, Na Ubonahalize ka milomo ya bapolofita ba Hae ni ku U paka ka batanga ba Hae. Mwabona? Mulemuhe.

⁵⁵ Mulimu wa Iketelanga Iliyena, ka kulemuha kwa pili, na ketile bapolofita ba lusika ni lusika. Mu li lemuhe. Wa toma mufuta wa mupolofita yani kuli aswane mwa lusika lwa teni. Mwabona, Wa toma ka mukwa wa hae, kaufela sa eza. Wa mu toma kamba uitutile kamba ha si ka ituta. Wa toma limpo, mufuta wa ka kutaza ka ona, limpo za kaba ni zona. Ni Liñusa la lusika lwa teni Iwani, Mulimu ulukisize lika za kuli zani kuli liezahale mi hakuna sika sisili se si kona kunga sibaka sa zona. Hakuna taba kamba ki sikamañi, ki litaba zekai za ipumanezi mutu, hakuna se si kona kunga sibaka sa zona. Na tomahanyize mutu, mwendi ki mutu wa sitimbi. Hakulata na mu tomile kuba mufuta omuñwi wa mutu. Sali sona kaufela, Wa mufa sikhwata sa habo, mpo ya—ya hae, wa mufa mufuta wa hae, buino bwa hae, ni seo kaufela sili sona, ka mwa iponahaleza yena muñi, ni seo kaufela aeza. Ueza kuli muuna wa hola ya teni aswale sicaba sa hola. Luli. Wa eza cwalo.

⁵⁶ Kwa mafelelezo a lusika lufi kamukana, fo keleke ha se ifetuhezi kwa lifasi ni kueza sibi, ni kuyendamena fa toloko ya mutu ya Linzwi. Sina kamita, bona kamita, kwa mafelelezo a

lusika, ba fitanga mwa butata bo bu cwalo ka baituti ba bona ba za bulapeli ni baprista kufitela liba fela ze lyangani. Kamita toloko ya bona i fosahalile, hakuna nako fo isika ba ye fosahalile. Mi hakuna nako nihaiba yekana fo Linzwi la Mulimu likile la palelwa kuba la niti. Yani kona shutano.

⁵⁷ Cwale mwa bona, Mulimu na ñozi Bibebe, Yena kasibili. Cwale, Mulimu wa kona kubulela. Mushe na bulezi kuli Na ambozi ku yena. Jeremia naize, “Na beile Manzwi mwa mulomo waka.” Mi Mulimu wa kona kuñola. Na ñozi milao ye lishumi ka munwana wa Hae Tota. Na ñozi fa mamota a Babilona. Mi, muhupule, mwa Testamente ya Kale fela, linako ze likana likiti zepeli bapolofita ne baize, “KISONA SA BULELA MULENA!” Mulimu wa kona kubulela, Mulimu wa kona kuñola. Luli. Buñata luli bwa Mateu, Mareka, Luka, ni Joani, ki ona Manzwi a Mulimu luli Kasibili, Jesu Kreste inza bulela. Kacwalo, haiba nji Mulimu wa kona kuñola, haiba nji Mulimu wa kona kubala, haiba nji Mulimu wa kona kubulela, kikuli Hakoni kueza babañwi kuli baeze ze swana? Kana Na si ka li ku Mushe, “Ki mañi ya eza mutu simumu kamba ki mañi ya eza kuli abulele?” Mulimu na ñozi Bibebe ka bapolofita, nzila ya Hae ya kueza lika.

⁵⁸ Cwale nako kaufela fo keleke ha i lyangana (mi Mulimu wa zibanga kuli baka lyangana, kakuli Na zibile kale lika kaufela), kabakaleo Una ni mupolofita wa Hae yomuñwi ya lukisizwe mwa lusika lwani, kubiza baketwa ba Hae ka Linzwi la Hae leli supilwe la lisupo ni limakazo, ni kupakiwa kwa Linzwi la Hae, “kupaka Linzwi ni lisupo linze li latelela,” sina mwa Na sepiselize. Wa fa toloko ya niti kasamulaho mupolofita yena luli ha sa pakilwe.

⁵⁹ Kaufela kwanda bani, baketwa ili ko a lumezwi, ba mutoya. Cwale, mu batisise ka tokomelo mi mubone haiba sani ki sa niti kamba nee. Konji fela bona bao A lumezwi teni! “Na tile ku ba Hae Luli, mi ba Habo Yena ha ba si ka Mu amuhela. Kono bona baba Mu amuhezi, ku bona U bafile mata a kuba bana ba Mulimu.” Mulemuhe, hakuna...tatubo ya Linzwi kaufela, mwa litaba kaufela, mi ni kwa mafelelezo a lusika kaufela kamba fa halimu kamba manganandila, sina ha Ni kutilize fateni linako zeñata.

⁶⁰ Mutualime kwa lusika lwa Nuwe, kwa mafelelezo ku sikaba kale katulo. Ki sikamañi sene siezahalile? Nuwe, neli fela lusika lwa hae fela lone lu lumezi muuna yani. Babañwi baba siyezi ne ba mu kananisize. Mi asinya lifasi kaufela.

⁶¹ Mwa mazazi a Abrahama, ki sikhata fela sa Abrahama se ne si lumezi. Fani Mangeloi hana ilo kutaza kwa Sodoma, neli fela Lota ni musala hae ni bana ba basizana bababeli kona bene ba zwile, mi musali afetuha kuba musumo wa lizwai.

⁶² Mwa mazazi a Mushe, neli fela baketwa ba Isilaele kona bene ba zwile. Mi Faro na mu toile.

⁶³ Mwa mazazi a Elia, lika kaufela (buñata) bwa zona kwanda baana baba eza likiti ze supa, mutu ni mutu wa bona na mutoile, naaha kaufela.

⁶⁴ Mwa mazazi a Jeremia, kiñi, ne ba mu posaka miselo ye butala, ni ku mu biza kuli silyangu, kakuli na inelezi kwa neku la hae ka mazazi a amañata hahulu, ni kwa neku leliñwi, ni—ni kunga lika ze ne bonahalisa lisupo. Ne ba mu toile.

⁶⁵ Isaya mupolofita, na nyazize hahulu lusika lwani kufitela ba mu puma fahali ni saha mwa liemba zepeli. Kulukile.

⁶⁶ Joani Mukolobezi. “Nali mutu wa mwa mushitu kwatasi kwani, sipulumuki sesiñwi sa lilata.”

Kamukana kono—kono kwanda balutiwa bani bana tisize ku bona Jesu Kreste kakuba keleke! Ki fo cwale. Joani na lukisize sicaba. Ki babakai bana nani? Mwakona ku ba bala ka minwana ye mibeli . . . mazoho amabeli, minwana yamina, ki babakai bana tisize Joani ku Jesu fani ha Na tile. Cwale, kucwani he ka Kutaha kwa Hae kwa bubeli? Munahane fa teni.

⁶⁷ Kono cwale balumeli ba niti ba Bibebe haba bona Linzwi ha li pakiwa patalaza kwa lusika, ba lumela. Hakuna mukwa wa ku bapatela Zona, ba Li lumela. Mane ba kwala bupaki bwa bona ka mali abona. Ba Li lumela. Ki fani cwale ki bona, baba ketilwe, kuli mwa lusika lwani lo lu bona ni ku lumela.

⁶⁸ Babañwi habakoni fela ku Li bona; ba foufalizwe. Cwale, mu li, “Habakoni ku Li bona.” Cwale, sina Balami, kiñi kanti Balami hana sika bona Sani? Na li mupolofita, ya tozizwe. Kiñi kanti Faro hana sika Si bona? Fani hana boni lizoho la Mulimu kutahafafasi ni kueza limakazo mwahali mwani, ne si tatafalize fela pilu ya hae. Kana ki niti yeo? Kiñi kanti Datani hana sika Si bona, mbo nali Mujuda ni yena? Ona kwande kwani, na tile kufita ni mwa Liwate Lelishwile, ni kuca manna busihu ni busihu, yene wanga ili yemezi, kono niteni na si ka Si bona. Kiñi kanti Kora hana si ka Si bona? Kiñi kanti Kefasi hana si ka Si bona? Nali yena muuna wa toho ya lifasi la bulapeli ka nako yani. Kiñi hana sika bona kuli yani nelii yena Mesia? Kiñi kanti Judasi hana si ka Si bona? Judasi na inzi mane ni bona, ku zamaya ni bona, kueza limakazo ni bona. Kono Linzwi ne li na ni kutalelezwa. Bibebe ibulela kuli ne ba pepezwi ku to nga ona sibaka sani. Ne ba pepezwi ona mulelo wani. Yani ki niti Maroma 8 ya bulela cwalo.

⁶⁹ Cwale balumeli bakona ku bona Linzwi ha li eziwa nama mwa lusika lwa bona, Mulimu wa bulela. Cwale, balumeli ba niti bani, bani babaeza likiti zesupa (kamba ne li mianda ye supa?) mwa mazazi a Elia. Likiti zesupa kona ye lukile. Mwa mazazi a Elia, neku na ni baana babaeza likiti zesupa kuzwa mwa sikwata mwendi se si likana ni tuu kamba sili milioni, bene ba boni sani ne Si lukile. Kutockwa mane nihaiba mwanda wa batu, kwani. Kono ne ba boni kuli ne I lukile. Ne ba boni Mulimu ha

iponahaza. Mbelwa yomunyinyani wa kale yani kwana lumezwi Elisha, musali nailo nopa twandilala twani, kuli apange liñende, mi ne tukona fela kupanga liñende la hae ni mwana hae wa mushimani, mi kuzwa fani ba shwe. Kono mutualime Elia, na bulezi kuli, "U ezeze na, pili. Kakuli, KISONA SA BULELA MULENA, tubana haina kufukuzeha nihaiba silibelo hasina kukala kufitela lizazi leo Mulena Mulimu haka luma pula mwa naha." Hakuna puzo, musali naile ona fani mi ayo luba liñende ni ku to mufa lona. Ali, "Panga laka pili, mi kuzwa fo uyo eza la hao ni mwana hao wa mushimani." Kakuli, na utwile muuna yani, ni ku mutualima; nali peu yene lelilwe kale.

⁷⁰ Buñata bwa bona bali, "Ki yani fani muika wa kale hape. Mulimu ulu kutile bakeñisa yena," muhupule, Elia. Naize, "Ki wena ya kataza Isilaele."

⁷¹ Yena ali, "Ki wena ya katalize Isilaele." Mwabona yo Mulimu . . . Neli Linzwi la Mañi la na paka? Linzwi la Hae Tota.

⁷² Cwale Bibele i bulezi kuli neba pepezwi mulelo ona o, kono cwale . . . yena—yena ya sa lumeli. Kono cwale fo mulumeli wa niti ha bona Linzwi la lusika lwani hali taha mwa nama, Mulimu wa bulela ka milomo ya batu mi ni kueza ona cwalo sa Na bulezi kuli Uka eza, ani kona mafelelezo!

⁷³ Cwale mutualime ze siyezi za teni. Musike mwa talima lisupo. Haiba mutualima lisupo, mu ka pumiwa sina fela lifasi. Bapolofita ba buhata baka taha mi ba bonise lisupo ni limakazo ze ka puma baketwa haiba ki nto ye konahala. Mutualime Linzwi. Mutualime baprista ba, bapolofita ba, mupolofita wa mu Heberu inza yemi fale. Zedekia ni manaka amabeli amatuna, ni kubulela kuli, "Na ni mupolofita ya supilwe ni ku ketiwa ki Mulimu." Ki niti. "Ni na ni baba eza mianda ye milalu ni baba nainte naini babainzi ni na ona fa, ni Moya o Kenile ufa halimwa luna, wapaka ni kubulela kuli naha yani ki ya luna. Haluyeni kwateni mi lu yo inga. Mi ka manaka a, Akabe, uka kasha sila kuzwa mwa mubu wani, kakuli ki Mulimu yana lufile mubu wani."

⁷⁴ Mutualime muuna wa bulapeli yani, muuna yomunde, Jehoshafati, ali, "Kana hauna nihaiba alimuñwi hape?"

⁷⁵ "Alimuñwi hape? Kuna ni baba mianda yeminde mwa tumelelano!" Ki hali, "Eeni, kuna ni alimuñwi ona kwanu, kono Ni mu toile." Ali, "Yena kamita ki wa ku luhanyaukela fela ni ku lu bulelela kuli lu ba eza libi ba batuna, ni lika kaufela." Ali, "Ni mu toile! Yena, ki Mikaya, mwana Imila."

⁷⁶ Mi ali, "Oh, mulena asike abulela cwalo. Zamaya u yo munga mi lu utwe sa ka bulela."

⁷⁷ Kacwalo ba mu tisa kwani. Ki hali, "Mu ni fe busihu bwa kacenu kona Ni ka bona seo Mulena abulela ka sona."

⁷⁸ Akabe ali, "Na ku lapela, usike wa ni bulelela taba isili kono niti."

⁷⁹ Mi muuna ataha, ali, “Cwale, haiba nji ubata kukutela mwa kopano hande, ubulele fela sina babañwi kaufela.”

Mikaya ali, “Ni ka bulela fela seo Mulimu abulezi.” Mwabona?

⁸⁰ Habusa lelitatama, ba zwela kwande. Malena batina mikanjo yabona, baina mwa munyako, makumuca kaufela bona. Mupolofita ali kuyema fani. Bali, “Cwale, muika, ki sikamañi so bulela ka sona?”

⁸¹ Ali, “Kambama u zamaye.” Ali, “Kono Ni boni Isilaele ushasani sina lingu ze tokwile mulisana.”

⁸² Mi kiha-... anga lizoho la hae ni ku mu bakula fa mulomo. Mupolofita anata mupolofita lubaka fa mulomo. Cwale, sibeli sa bapolofita baba tozizwe bani ne ba yemi fani, neba polofitile, baba mianda yemine kulwanisa alimuñwi, sani ne si bonahalile kutatafala luli. Cwale, mwa buñata bwa likelezo kamita hakuna bunde mwateni. Ku itingile fo ba... se ba eleza ka sona, seo kelezo yabona ili yona. Ne ku sina buiketo kwani ku mulena, mi anopa kelezo ya sirkwata yani kuli nei lukile. Kono kambe na ka tuhela fela ni ku apula matapa ni kutilima sa na bulezi Elia.

⁸³ Cwale, Mikaya na si ka bulela sika, na sa zibi, kamba mwendi Mulimu na mu swalezi ka sona. Kono pili, kakuba mupolofita, naile ku Mulimu ku yo batisisa sana bulezi Mulimu. Mi afumana sana bulezi Mulimu. Ki hali, “Ne ni boni Mulimu inza inzi fa lubona, mi A li... nana ni baelezi ba Hae kaufela ba Lihalimu banze ba kopani ku Mu potoloha, ali, ‘Ki mañi ye Lu kona kulumafafasi kuli a yo eza kuli Akabe azwele kwani, kuli Lu taleleze sipolofita se si polofitilwe ka yena?’”

⁸⁴ Mwabona, sipolofita, Elia na bulezi kale kuli, “Linja li ka kapa mali a hao.”

⁸⁵ Mi kacwalo ni yena ali “ni boni moyo o puma ono zwile mwatasi, ha utaha, wa taha fapila Hae, wali, ‘Ni ka shetumuka ni kene mwa bapolofita ba hae, bapolofita ba Akabe, ni kuba eza kuli ba polofite buhata.’”

⁸⁶ Cwale, Mulimu na zibile kuli baana bani ne ba ikuhumusa hahulu ka lituto za bulapeli zene ba hupula kuli ne ba na ni lika kaufela ze lukile. Neba sika lemuha kale Linzwi la hola. Kacwalo Mulimu ali, “Mu ka yo kondisa; muye muzwele kwateni.” Mi cwale Mikaya hana bulezi cwalo, sani ne si ba tiselize kuli bapolofite mwatasa moyo o maswe. Neba ka comola muhala wa luwaile fo ucomekelwanga, kamba kutima silimba, kamba kueza sika kaufela; hane ba ka utwa Sani ha si taha ku to ba lwanisa, kuyema ni ku zwela fande. Kono mutualime sene si ezahalile. Cwale, Mikaya na tatubile pono ya hae ka Linzwi leli ñozwi, kabakaleo na zibile.

⁸⁷ Ki hali, “Ha Ni ka yo kuta...Mubeye muuna yo mwa tolongo, mu mufe mezi a manyando ni buhobe bwa manyando. Ha Ni ka yo kuta, Ni ka to bonana ni yena.”

⁸⁸ Ki hali, “Haiba uka yo kuta ni hanyinyani, Mulimu ha si ka bulela ku na.” Fani kona fana zibezi kuli pono ya hae ne i zamaelela ni Linzwi la hola yani. Neli nako ya Akabe.

⁸⁹ Muzwale, kezeli, ye ki hola ni nako ya kubizwa kuzwa mwa Babilona. Liseli la manzibwana liteni mo. Mu zamaye mwa Liseli ha ku na ni liseli. Mulemuhe, balumeli ne ba boni Linzwi ha li talelezwa mi ba Li lumela. Jesu naize, “Lingu za ka li ziba Muhuwo wa Ka, Linzwi la Ka, lisupo za Ka za lusika. Za buhata halina ku latelela.”

⁹⁰ Cwale halu kuteñi kwa taba yaluna, kakuli Ni bona kuli Ni ka keluha. Ni bata ku tiiseza fa mukoloko wa litapelo wani hahulu. Halu kuteleni kwa taba cwale ye lu sweli kutilima ku yona cwale, fa muzuzu. Kihande, kukana ku ezahalanga hape sina mo ne ku belanga, kamita.

⁹¹ Mulimu na lumile mupolofita wa Hae, Joani, sina Linzwi la Hae hane libulezi, ne lisepisizwe mwa Malaki 3, “Amubone, Ni luma numwana wa Ka fapila pata ya Ka, kuli alukise nzila.” Joani na pakile taba yeswana. Mi lufumana hape, mwa Isaya 40:3, kuli Isaya naize kuli, “Kukaba linzwi la mupolofita, ya ka huweleza mwa lihalaupa, ‘Mu lukise nzila ya Mulena.’” Mwabona? Bupolofita bwani kaufela! Mi—mi mutualime, mulemuhe kapili, Mañolo na mu paka.

Hane ba bulezi kuli, “Ki wena mañi? Kana ki wena Mesia?”

Ki hali, “Ha ki na.”

“Kana ki wena Jeremia? Bapolofita, kamba alimuñwi wa bona?”

⁹² Ki hali, “Ha ki na. Kono ki Na linzwi la ya huweleza mwa lihalaupa, sina mupolofita Isaya ha bulezi.”

⁹³ Mu nahana kuli neba ka lumela sani? Batili, sha. Kiñi? Na sika taha ka keleke ya bona. Na si wa habo... Mwabona, na ile mwa lihalaupa fa myaha ye ketalizoho ka yemine ya kupepwa, ni ku yo kuta ana ni ye mashumi amalalu. Liñusa la hae neli lelituna hahulu kuli aye kwa sikolo sa bulapeli; nali yena yana lukela ku zibahaza yena—yena Mesia. Mi mutu kaufela na muhohela kwa neku *le* ni kwa neku *lani*. Mi Mulimu a muluma mwa lihalaupa, kasamulaho wa lifu la ndatahe, Zakaria. Mi nali muprisita, kono na si ka latelela buino bwa bo ndatahe.

⁹⁴ Kakuli, bapolofita haba zwangi mwa lika za mufuta o cwalo. Ba zwanga mwa libaka ze nyandile, mwa mahalaupa. Hakuna mutu ya ziba ko ba zwanga, kamba mo ba iponahaleza haba shokomoka, kamba nihaiba litaba za bona za kale. Batahangafela ona fo mi bakala kukutaza Linzwi, mi Mulimu wa ba

shimba, mi kipeto ba iconga; ku nyaza lusika lwani, ni ku zamaya kukena mwa Linzwi la Hae, ku libelela lizazi lelituna.

⁹⁵ Keleke ne isika mu lumela, kakuli na sa zibahali ku bona. Ne ba si na paho ya ku beiwa mazoho kwa hae mwa libuka za bona, kacwalo he ba mu hana. Mwabona, ne ba si ka lumela Linzwi la Mulimu le li pakilwe, patalaza, taku ka taku. Mwabona? Malaki 3, Mañolo amabeli kuli a mupake, Malaki 3 ni Isaya 40:3. Mwabona, sibeli sa Mañolo ani na bulezi ka muuna yana taha, ku lukisa nzila ya Mulena. Na kopani ni ze lukela kaufela za teni.

⁹⁶ Na lukela kuba mupolofita. “Ni ka mi lumela Elisha.” Mi ki yani fani, mwa mukwa kaufela o buhali. Mutualime sibupeho sa hae mo ne si swalisanze ni Elia. Elia nali muuna wa lihalaupa, kacwalo ni Joani ki mwa na inezi; wa mwa naheñi. Na si mutu ya bunolo, nali ya pazauhile.

⁹⁷ Mulemuhe hape, Elia na toile basali, na bulezi Jezabele ka mipende ya hae kaufela, ni fa na lukisa ni ku fosa. Ni Joani nali cwalo. Jezabele na likile ku bulaya Elia, na konkile ka balimu ba hae kuli uka mu puma toho. Ku cwalo ni ku Heroda. Mwabona?

⁹⁸ Kamita mulemuhange liñusa la bona, mu lemuhe sene ba ezize. Cwale lufumana cwana kuli kambe ne baka talima kwa mulaho ni kubona sene i bulezi Bibebe, mi mutualime sibupeho sa muuna yani ni mwa na bezi ya petehile mwa nako ni Mañolo ni lika kaufela, ne ba lukela kuziba kuli yani neli yena. Kwanda baba silezi kona bene ba mu zibile. Yani ki niti. Isiní baba fitelela silezi ne ba sika mu ziba. Ne baile ku yo mu teezeza, kono ne ba si ka Li lumela. Mwabona? Kiñi? Ne ba si ka lumela zibahazo ya sipolofita mwa hola ya bona.

⁹⁹ Mulemuhe, ne ba mu sehile, ku mubiza kuli “wa lilata, wa naheñi, silyangu se si sika ituta mi asina sikolo, ‘hi, haki, tota, kulwala, kubata,’ ze cwalo.” Sina kamita ba mu atula ka tuto ya hae. Ba mu atula ka sikuwa sa hae, ka mukwa wa na apala ka ona. Nana ni litalo la ngu lana i tamile, ni lukanda lwa mukata wa kamele, nana ni bulizi kaufela. Inza zamaya mwa mezi; na sina keleke, na sina sipula, na sina balikani; ne ba si ke ba amuhela zani; ne ba sweli ku lapela mulimu wa lifasi. Mwabona?

¹⁰⁰ Hani talusi kuli cwale hakuna bapolofita ba buhata baba tahanga, sina Jambresi ni Janesi. Kono mukwa o mubata kueza ka ona, ki kutatuba liñusa la pili ka Linzwi, konakuli mu na ni lona; ki lusika mañi lo i fumaneha ku lona, ni se si sepisizwe sa lusika lwani.

¹⁰¹ Konakuli sipolofita sa Joani ne si pakilwe mwa swanelo ya Mulimu Kasibili. Mutualime kupetahala kwateni. Bibebe i bulezi kuli, “Linzwi la Mulena litahanga ku mupolofita.” Mi Jesu nali Linzwi. Mi Joani na polofita kutaha kwa Linzwi kuli ku talelezwe; mi Jesu, yena Linzwi, natile ku mupolofita, mwa mezi. Oh, haki bunde ni boo! Ku sa palelwa kwa . . . Mwabona? Linzwi

neli sa atisi kuba teni mwa lizazi lani. Ki ha kutaha mupolofita, ali, "Ki na muhuwo wa Linzwi."

Ki ha bali, "Ki sikamañi se lu lukela kueza?"

¹⁰² Ali, "Hani lukeli ku tamulula likatulo za Hae. Kono kuna ni Alimuñwi ya yemi mwahala mina, kokuñwi, Yo ki yena Ya ka mi kolobeza ka Moya o Kenile ni Mulilo. Liselo la hae limwa lizoho la Hae, mi Uka fiyela sihoto sa Hae kufeleleza, muuku ona a u cise mwa mulilo o sa timi, akubukanye mabele mwa lituli la hae." Oh, ki mupolofita ya cwani! Jesu na bulezi kuli neku sina muuna ya pepilwe ki musali yana li yomutuna sina yena, kufitela lizazi lani. Oh, mwa na halifela! Mwa na zibela fa na yemi! Na zibile hande ka swanelo. Na utwile ku Mulimu, mi neli hande kuzamaeleta ka Linzwi, kacwalo na si ka tokomela se ne ba bulela batu. Na Li kutalize ni ku Li polofita, nihakulicwalo. Mi mulemuhe, haiba nji mutu uyemela sa Niti, konakuli Mulimu una ni ku yemela mutu yani kwa Niti.

¹⁰³ Fani Mushe hanaile kwani kwa Egepita, mi ali, "Ne nili mwa lihalaupa kwa buse, mi Na bona kota inze i tuka mulilo, mi ne isika ca. Ki ha ni ya kwa kota, mi, hane Ni ezize cwalo, neku na ni Siita sa Mulilo sesituna. Mi Linzwi se lili, 'NITENI NA YA LITENI.' Mi A ni bulelela kuli ninge kota ye ni kutaha kwanu ni kueza limakazo ze, mi kipeto Mulimu uka yemela Linzwi la Hae." A otolola kota ya hae, ki ha kutaha linda ni linzi, ni lififi ni zeñwi cwalo. Mi cwale fa kupaka mupolofita yani, A tisa balumeli bani kwa mulaho fela wa lilundu, mi Mulimu atuluka mwa Siita sa Mulilo sesiswana, ona fani fa lilundu leliswana, mi apaka kuli sani neli niti.

Cwale mutualime Sa ezize mwa lizazi le. Luli.

¹⁰⁴ Cwale, Linzwi ne litile ku mupolofita ni ku to mu paka kuli neli mutu wa niti, yena mutu luli yo Mañolo na bulezi kuli ukaba yena. Kapili cwale. Kono, hape, Jesu natile mwa mufuta o shutana kuzwa kwa mutolokelo wa bona wa butu wa sipolofita. Mutu na tolokile mo ne ku ka bela. Luli. Ba Presbyterian ba nahana kuli i lukela kuba bona. Mutualime fo Mulimu ha eza sika kaufela, mutualime katengo kakañwi kaufela kaka tile ni alimuñwi. Eeh, kamita kubile ona cwalo. Bana ni Jambresi ni Janesi kai ni kai. Mulemuhe, ba bulezi siemba sa Linzwi. Kono, kuya ka Linzwi la mupolofita, Taku kaufela!

¹⁰⁵ Ne ba tokwile ku sibona hape, sina kamita, ba Mu biza kuli ki mulauli, "ki diabulosi; Balezebubi," mi bali Na ikeza Iliyena kuba Mulimu, kanti ne ba lukela ku ziba, ka Bibele ya bona luli, kuli Nali Mulimu.

Mulemuhe, Na polofilwe ka Isaya, Isaya 9:6, iize, "Libizo la Hae lika bizwa Mulimu ya Mata, Ndate wa Kamita." Hakuna kuba bo ndate babañwi hape kasamulaho wa fani, kakuli Na li yena Ndate wa makalelo kwa simuluho, ki Yena Ndate anosi; naize, "Musike kubiza mutu kaufela wa lifasi le kuli, 'Ndate,'

kamba, kasamulaho wa fani.” “Ki yena—Yena Mulimu ya Mata, ni Ndate wa Kamita, Muelezi, Mulena wa Kozo.” Kaniti.

¹⁰⁶ Cwale, neba ezize ku Yena se ne ba bulezi bapolofita kaufela kuli baka eza, sina fela mo ba ezeza ona mwa Lusika lo lwa Laodesia, ku Mu nepela kwande a keleke. “Sibofu, mapunu, mi ha ba zibi cwalo.” Ona cwalo fela mwana bulezi mupolofita, yena mupolofita wa Bibebe. Ku foufazwa ka lizo za batu, ne ba Mu kashelize kwande, Linzwi kuzwa mwa likeleke za bona, sina kamita, sina mo ne li polofitezwi ku bona.

¹⁰⁷ Mulemuhe cwale, kapili cwale. Musike mwa latehisa se cwale. Ki ye fa palo, ka mo Jesu na Itibahalize kwa balutiwa bababeli ba kuli Nali Mesia wa bona! Cwale, meto kaufela kwa neku le. Mi kwande mwa naha, musike mwa latehisa se cwale. Lu likile ku mi bulelala kuli Bibebe ki Linzwi la Mulimu, ye ñozwi ki Mulimu Kasibili, ka milomo ni libelekiso sa mutu. Mulimu wa kona kuñola, Yena muñi. Mulimu wa kona kubulela, Yena muñi. Mulimu wa kona kueza Sa bata kueza, kono Na ketile mutu kuli a si eze kakuli yena mutu yana Si ñozi ki siemba za Mulimu. Kacwalo, Mulimu na ñozi Bibebe. Baana bani ne ba sa zibi mane nihaiba ze ne bañola, mwa mihupulo ya bona tota. Bakona ku kanana ni Yona, kono ne ba I ñozi. Ne ba si ke kukona. Bibebe i bulezi kuli, “Baana ba kale, hane ba nze ba zamaiswa ka Moya o Kenile!” Mulimu na zamaisa mazoho abona, na zamaisa meto abona mwa lipono. Neba palelwa kubulela sika kaufela konji se ne ba talima ku sona. Ne ku sina se ne ba kona kubulela, kakuli Yena na zamaisa malimi ka kutala, minwana, kalulo kaufela ya mubili neili mwa zamaiso yetezi ya Mulimu. Ki kabakaleo Bibebe i bulezi kuli neli balimu, neba li siemba sa Mulimu! Nali yena mutalelela wa Mulimu.

¹⁰⁸ Mulemuhe ka mo Jesu, yena Linzwi, mwa na ezelize balutiwa bababeli bene ba lobehile lipilu ba kuziba kuli Nali yena Mesia, yena Mesia, Linzwi leli sepisizwe. Mulemuhe sa Na ezize, Na supelize kwa sipolofita. Mulemuhe, “Likuba, ba lipilu ze liyeha ku lumela kaufela ze ba ñozi bapolofita.” Cwale, Na si kali, “Kihande, sikamañi, kana keleke ibulela sikamañi ka sona?”

¹⁰⁹ Ne ba Mu file likande. Ne ba zibile likezahalo kaufela zene ezahalile. Kaufela bona ne ba swabile. Neba kalile ku Mu bulelala, “Kana ki Wena muenyi fela mo, kamba ha U zibi ze ezahalile mwa Jerusalema?”

¹¹⁰ Yena ali, “Litaba mañi?” inge kuli Na sa zibi. Mwabona, U ezanga lika fokuñwi kuli abone mo mu ka ezeza ka zona. Mwabona? Ali, “Litaba mañi? Ne li mañi? Kiñi ze ezahalile?”

¹¹¹ “Kana ki Wena fela muenyi?” Kanti neba ambola ku Muuna yene ba pilile ni yena ka myaha ye milalu ni licika, mi ne ba sa Mu zibi.

“Litaba mañi? Ki likamañi ze ezahalile?”

¹¹² “Kihande,” se bali, “Jesu wa Nazareta, yanali Mupolofita. Hakuna kukakanya mwa minahano ya luna. Nali ya mata ka Linzwi ni likezo fapila sicaba kaufela. Ne lu Mu bona ha eza lika kuli Na pakilwe kuba Mupolofita wa Mulimu wa lusika loo. Lwa ziba cwalo. Mi ne lu lumela kuli ki Yena yana kaba Muliululi, kuli Uka liulula Isilae.”

¹¹³ Mi ki Ha sikuluha ni kubulela kuli, “Mina likuba, ba lipilu ze liyeha ku lumela kaufela ze ba bulezi bapolofita ka Yena kuli li ka ezahala?” Mwabona? Mu Mutualime cwale mukute kwa sipolofita. Ki kalimelo ye cwani kwa balumeli, bene ba i papata kuli ne ba Mu lumezi!

¹¹⁴ Mulemuhe mwa Na kalezi ngambolo. Na si ka tumuka ni kubulela kuli, “Ki na Mesia wa mina.” Na ka eza cwalo ni yena, kakuli Na li yena. Kono mulemuhe Na itibahalize Iliyena mwa Linzwi, kuli ba kone kuziba. Kambe Na ka bulela cwalo, Na ka bulela cwalo mi ne ku si ke kwaba cwalo; kono cwale ha Na ile mi akala kubulela ka bapolofita bene ba bulezi sesiñwi ka Yena, mi ba si bona, mi se ba kona ku ipulelala, haiba neli bana ba Mulimu. Kono na ba hupulisa se ne ba bulezi bapolofita kale ni kuli ba libebole mwa nako yeo Mesia, lusika lwa Hae, ne lu ka bonahala. Yena, sina Joani, na tuhezi Linzwi, yona Bibele, kuli ba lemuhe Liñusa la bona. Mupolofita kaufela wa niti na ka eza cwalo. Eeh. Na si ka tulelala kubulela kuli, “Ki na Yena. Kina . . .” Yani ha ki mupolofita wa niti wa Mulimu. Mwabona? Kono Na ize, “Mukute kwa Mañolo.” Mwabona, Yena ha palelwi ka nzila ya Hae ya kueza lika. Mwabona?

Na ize, “Lwa muziba Mushe.”

¹¹⁵ Na ize, “Kabe mu muzibile Mushe, ne mu ka Ni ziba.” Na ize, “Mushe na ñozi za Ka.” Ali, “Mubale Mañolo, ku Ona mu nahana kuli mu na ni Bupilo Bobusafeli, mi Mañolo kona apaka za Ka. Muye mu yo talima mwa Mañolo mi mu bone.”

¹¹⁶ Fa Ha si ka cinca mukwa wa Hae wa kueza lika ka ona, ali kuba a cince. Yena hakoni ku cinca, kakuli Yena ki Mulimu ya sa cinci. Mwabona? Mulemuhe Na kutezi kwa balutiwa bababeli ba, Kleopa ni mulikana hae, fa musipili wa kuya kwa Emausi, mi ali, asupeza Mañolo ku bona, ali, “Kiñi ha mu li likuba hahulu cwalo kuli mulumele Linzwi kaufela leo bapolofita bañozi kuamana ni Mesia za na ka taleleza?” Oh, ki lizazi mañi!

¹¹⁷ Joani na ezize lika zeswana. “Mubale Mañolo, mutualime kwa mulaho, naize kuli kukaba ‘linzwi la ya huweleza mwa lihalaupa.’ Ki kai ko Ni zwelela?” Mwabona? Sani, sani ne si lukela kuba patalaza ku bona. Luli!

¹¹⁸ Si lukela kuba patalaza kacenu, lika ze lubona Moya o Kenile ha usweli kueza. Nako yeñwi naize, “Mubale Mañolo.” Mi luna . . . Ubata kuli lu eze cwalo kacenu.

¹¹⁹ Mulemuhe, Na kalezi ka sipolofita sa Mushe, Bibele i bulezi kuli, “Mi, akalela ka Mushe ni bapolofita babañwi kaufela,”

kono Na kalile ka Mushe. "Mupolofita," Mushe ali, "Mulena Mulimu wa mina uka zusa mwahala mina sicaba, mwahala sicaba. Mulena Mulimu uka zusa Mupolofita."

¹²⁰ Cwale Na ka bulela kuli, "Kleopa, ni mulikana hao fa, kana Mushe na si ka bulela kuli mwa mazazi a maungulo a Mulena Mulimu uka zusa Mupolofita? Mi yena Muuna yene ba takisize yani, kana Na fitile fa linepo zani? Cwale, Mushe na polofitile se. Mi cwale hamusika ba ni mupolofita fa mianda anda ya lilimo, mi fa ki yo Muuna uzuhile. Mi mutwaleti wa Muuna yo nali sikamañi, kikuli mwa bulela?" Mwa utwa nji? Ni bapolofita kaufela ba bulezi ka Yena, mwa lusika lwa Hae, Na bulezi ku bona. Na sepa ne luka tabela ku teezeza ku Yena. Kikuli ne mu si ke mwa tabela ku Mu utwa? Ne ni ka tabela ku Mu utwa, ku Mu utwa, sa Na bulezi kuli bapolofita neba bulezi ka Yena, kono Na si ka bulela kuli neli Yena. Na ba bonisize fela sipolofita. Na bulezi fela kuli, "Mupolofita naize kuli sakuli si ka ezahala." Mwabona?

¹²¹ Halu kuteñi fela kwa mulaho ka mizuzu ye likani, mi cwale luteeleze kwa Manzwi abulezwi ki yena Kasibili. Mutualime fa, Linzwi lona Kasibili kubulela Linzwi la Hae kasibili. Lona Linzwi Kasibili kubulela Linzwi la Hae. Isiñi ku ba bulelela kuli Nali yani, kono neli fela kutuhela kuli Linzwi li Ipulelele ka Lona liñi, mi ki ha se ba ziba Yo nali Yena. Taku ya Linzwi, kubulela Linzwi mwa... Linzwi mwa nama, kubulela Linzwi la litaku, ka ku itibahaza hande ku Yena muñi. Mutualime kwanu, cwale halu teezezeni ku Yena ha bulela. Kamo... Cwale, lu ziba kuli kaufela bona ne ba bulelezwi nyana ka litaba zene ezahala, fo ki kuli, ka za kutakiswa ni likande la zuho, za libita, sina ha u sa zo bala fela. Cwale Uya kulibana ni Linzwi la sipolofita ka Yena muñi. Cwale ha lu nahane ni fela kuli Na bulezi cwana; Na bulezi zeñata kufita ze, kono mutualime.

¹²² Halu bulelele ni za Hae... lu Mu utwe ha bulela, "Mu sikuluhele mwa Zakaria 11:12. Mi kana Mesia na sa lukeli kulekiswa, kuya ka mupolofita, ka lishekelle za silivera ze mashumi amalalu? Mu bulezi fela kuli Muuna yo na lekisizwe ka lishekelle za silivera ze mashumi amalalu. Amu apule cwale..." Musweli kuñola Mañolo ao sha? Zakaria 11:12. Mi cwale ki Hali, "Kana mu lemuhile sa na bulezi Davida mwa Lisamu, Lisamu 41:9? Na betekilwe ki balikani ba Hae. Mi cwale hape, mwa Zakaria 13:7, Na hanilwe ki balutiwa ba Hae. Mi mwa Lisamu 35:11, na tamelizwe litaba ka bupaki bwa buhata. Mu bulezi fela kuli Na li cwalo. Isaya 53:7, Na kuzize fapila bene ba Mu tama litaba. Isaya 50:6, ne ba Mu lwahile, mupolofita a bulela. Lisamu 22, Na lukela kulila fa sifapahano, 'Mulimu wa Ka, Mulimu wa Ka, kiñi Ha u Ni tuhelezi?' Kana Na ezize sani, maloba nyana fa musihali? Lisamu 22 hape, 18, liapalo za Hae ne ba ikabakezi zona mwahala bona. Kana ne ba ezize cwalo nji? Mi Lisamu 22:7 kuisa fa 8, na somilwe ki lila za Hae, ona keleke. Lisamu 22 hape,

ne kusina lisapo mwa mubili wa Hae le li lobilwe, kono ‘ba tabile mazoho a Ka ni mautu a Ka,’” Na ize. Kuswala mazoho a Hae kwa mukokoto wa Hae, hakuna kukakanya, ka nako yani. “Isaya 53:12 ili Na ka shwela hala lisinyi. Isaya 53:9 ili Na pumbekilwe ni bafumi. Lisamu 16:10 ali, ‘Hanina ku si ya moyo wa Hae mwa lihele, kamba kuli Ni tuhelele Ya Kenile wa Ka kubona kubola.’ Mi kana Malaki 3 ha ki yena mutwaleti wa Muuna yo?” Oh, Ne ni ka tabela ku Mu utwa ha bulela sani. Mutualime kwa sipolofita! Mulemuhe, konakuli mifuta kaufela ya Na kona kuba ni yona ya kamukana, ka za Isaka, mwa Genese 22, kamo Mulimu na bonahalezi ku Isaka, kuli mane ndate Abrahama anga mwana hae luli, ku kubukanya likota fa halimwa lilundu, ni kutaleka mwana hae wa mushimani.

¹²³ Neli kala kunwela ku mwahali bona. Na sa ba bulelezi kale kuli neli likuba kwa ku sa talima kwa sipolofita sa lizazi lani. Mi cwale se li kala kunwela mwahali, bakala kubona kutalelezwa kwa sene si ezahalile mwa mazazi a mafelelezo, mwa lilimo za mafelelezo zepeli kamba zetalu, sipolofita se si pakilwe mwa lizazi lateni. Neli ona fani hane batilo ziba kuli Mulikana bona, Jesu, na talelize Linzwi kaufela la se. Oh, neli ona fani hane batilo ziba kuli Muuna yani neli yena Mesia, kuli—kuli Na lukela ku zuha kwa bafu. “Libita ne li si ke la Mu swala. ‘Hanina ku tuhelela Ya Kenile wa Ka kubona kubola.’ Hakuna Linzwi nihaiba lililiñwi la sipolofita le likona ku palelwa. Mi Na zuhile.”

¹²⁴ “Konakuli linumwana zani kwatasi kwani kwa libita kakusasana wo ne li bulela niti. U zuhile kwa bafu. Wa pila. Ki yena Mesia yani.” Kiñi? Musike mwa tokwa ku li lemuha. “Likezo za hae, bulumiwa bwa Hae ni lika kaufela ne Li pakilwe kale hande ka Manzwi ao mupolofita na bulezi kuli lika ezahala mwa lizazi le. Ani ne li mafelelezo.” Mi se ba ziba kuli neli Yena, yena Mulikana bona yana kokotewi, Jesu, yana li ezize. Ki kabakaleo lipilu za bona ne li tuka mwahala bona ha Na sweli kubulela ni bona. Cwale ne ba zamaile limaili ze silezi, mi ne ku bonahalile kuli ki nako yekuswani.

¹²⁵ Mi ki ye fa taba yeñwi yene ba ezize, mwa ziba, ne ba utwile kutazo ya lihola ze silezi ka sipolofita ku talelezwa. Sani kona sa Na ba ambota mwahala musipili. Ona fani hane ba kalile fela lieto, A taha, kakuli Na liteni kwani kwa Jerusalema. Lihola ze silezi za ma... kasamulaho, liñokolwa ze mashumi a silezi, nebali mwa nzila ka limaili ze silezi kuya kwa Emausi. Sani kona seo sili sona. Mi Na kutilize, sipolofita se si pakilwe ka lihola ze silezi. Musike mwa ni nyaza ka lihola zetalu za ka, kanti, mwabona. Mwabona? Kono mulemuhe, ne ba kutilize... Yena... Ne ba utwile kutazo ya lihola ze silezi ka sipolofita kutalelezwa, kupakiwa.

¹²⁶ Cwale ne ku ya kuba manzibwana. Mwa ziba, Yena wa swana maabani, kacenu, ni kuyakuile. Neli fani ha Na kwaluzi meto abona kwa kuziba kuli Maheberu 13:8, Yena wa swana maabani,

kacenu, ni kuyakuile. Ka nako ya manzibwana, likezahalo libonahaliswa hande ka sipolofita. Se si ezahala mwa hola ya kacenu sa kona ku zibahala ka bunolo haiba mukona fela ku lumela sipolofita sa hola.

¹²⁷ “Eeni, likuba, baba liyeha ku utwisisa, baba liyeha ku lumela (kuzwelapili ku nahana ka lona), kwa ku lumela kaufela ze ba bulezi bapolofita ka Mesia, kana ne li sa lukeli ku ezahala?” Cwale Na tatabile litaba ze kukuta kwa mulaho kaufela ni ku bonisa sa na bulezi mupolofita kuli si ka ezahala. Mi se bakala ku utwisisa. Kacwalo ki Hali...aeza sina Wa fitelela. Neba mu tabezi Muuna yo. Ne baize, “Wena, U lufile sika sesiñwi. Ne lu sika nahana cwalo. Wa pila kokuñwi.” Ne ba sweli ku ambola ni Yena, neba si ka li ziba. Kacwalo ki Ha...mi hakuna kukakanya kuli Na ba talima ka maswabi, mi A kala ku zamaya kufitelela, kono Na—Na libelela kuli ba Mu meme. Sani kona Sa libelela busihu bwa kacenu, kuli mu Mu meme.

¹²⁸ Mulemuhe, fani balutiwa bani hane ba Mu memile mwa kopano ya bona fa tafule, neli ona fani fa Na ezelize sesiñwi sina fela mwa Na ezize ku sikaba kale kutakiswa kwa Hae, mi meto abona a kwaluha. Ne ba zibile mukwa wa Hae, buino bwa Hae. Ne ba zibile sa Na ezize, mi Na ezize fela sina mwa Na kile a ezeza sapili. Mi se bali, “Yani ki Yena!” Mi kapili ba nanuha ni ku zibahalisa kwande, mi A ikela. Mi ko ne ba felize lihola ze silezi za kuteeleza kwa kutazo ye, mwendi ka mizuzu ye mashumi amabeli ba kutela ku babañwi bene ba siyezi, “U zuhile ki niti. Yena kaniti wa pila.”

¹²⁹ Balikani, kwa ki kutalelezwa kwa Malaki 4, Muñoli Luka 17, Muñoli Joani 15, oh, amañata hahulu, Sinulo 10, bupolofita bo buñata hahulu bo bu kona ku tamahana hande kwa lizazi le. Mi hape ni mwa Buka ya Mareka ni mwa Mateu, mwa Na bulezi kuli ona limakazo zetuna ze ni ze komokisa lika bonahala mwa halimu, mi batu ba libiza kuli ki lika ze fukiswa ki moyo, ze fufiswa ki moyo, zakona—zakona ku iconga ka mata ni ka kuakufa kwa muhupulo, butali bo bu kona kutaha mwateni. Wa kona kuñola, Wa kona kubulela, Wa kona kueza kaufela Sa bata kueza. Ona Siita sa Mulilo sesituna, “wa swana maabani, kacenu, ni kuyakuile.” Mi ze sabisa za taha mwa lifasi, mundandwe ya bupahamo iya kufita mwa moyo, mwa halimu luli ko kusina mukamo kamba zeñwi, limaili ze mashumi amalalu kuya mwa halimu. Ne li bulezwi silimo ni licika li si ka ezahala kale, kuli ku ka ba cwalo. Mi kipeto mu sikulula siswaniso mubone Ya talimelafafasi. Hakuna Linzwi ni haiba lililiñwi le li kile la palelwa le ne li bulezwi, mi ki le fa Linzwi la Mulimu le li ñozwi, lipaka kuli ki Niti. Mi seli nako ya manzibwana hape. Ha ni zibi ha Na ka kuta, ka muhau, busihu bwa kacenu cwale sina mwa Na ezelize kwa mulaho kwani. Halu lapeleni mi lu Mukupe. Likezahalo libonahaliswa hande ka sipolofita se si pakilwe.

¹³⁰ Mulimu Yamata, lu tuse. Lu tuse, Mulimu yomunde, kuli lu utwisisé, ku utwisisa lika ze lu lukela kuziba, ku utwisisa Linzwi la Hao. Mi cwale, Mulena, lubile lu utwa likutazo cwale mwendi seli lilimo ze likiti zepeli, litaba ze ñozwi za libuka. Mi ni mwa mazazi a maungulo a ki ze likutile hape, mi cwale seli nako ya manzibwana. Ba Methodist, ba Baptist, ba Presbyterian, ni buñata bwa bona mwahala lusika ni Wena, mi mwendi ka mukwa fela wa lizazi lelituna lelisike kuba busihu kamba musihali, sina mupolofita hana ize, kono ka nako ya manzibwana kukaba Liseli. Jesu na zuhile mwa libita ni ku to iponahaza ku Simoni ni kwa basali, ni ku ba bonisa kuli Na li yapila. Fani neli kakusasana. Mi cwale mwa manzibwana A kuta hape. Kono Na zamaile ni bona mwa nako ya musihali, ku ba kalimela ka bubofu bwa bona, kono he A to Itibahaza iliyena ku bona mwa nako ya manzibwana.

¹³¹ Mulimu, taha mwa kopano ya luna busihu bwa kacenu ye lu nani ka kupotoloha Linzwi. Mulimu, ki nto ye sa lumelwi ki babañata kacenu mwahala sicaba, kono Ni itumezi kuli kuna ni babañwi bo Ubizize ni kuba keta kwa Bupilo Bobusafeli, mi No ize kuli, “Kaufela bao Ndate a Ni file baka taha.” Mi cwale fo Liseli la manzibwana ha li monyeha, ona fa ha U so lumelelize, Mulena, kuli hakuna bupolofita ni bo bukana (mwahala ze mianda ze utwahalile) ze kile za palelwa nako yeñwi. Mi kaniti haiba nji sani sa pakiwa, si lukela kuba Wena, kakuli hakuna mutu yakona ku kumba cwalo. Sina fela Bibele, hakuna mutu yakona kuñola, hakuna ni yomukana mwahala lilimo ze mianda ye lishumi ni ze silezi, ka bañoli baba shutana baba mashumi amane, neba kona kuñola, mi hakuna nihaiba mafosisa alimañwi ku Lona.

Mulimu Yomunde, Ni lapela kuli U iponahaza Iliwena busihu bwa kacenu, kaza Maheberu 13:8, kuli Wena uya swana maabani, kacenu, ni kuyakuile. Ni misebezi yo No ezize kwa mulaho kwani, Wa ieza kacenu. Mi No sepsize cwalo, No ize, “Mwa mazazi a maungulo a, fo lifasi libonahala sina Sodoma ni Gomora, kulyangana.” Lu talima bashimani ba mane inge basizana fela, batina liapalo sina bona, mi—mi kubona basizana balika kueza sina bashimani, ni kubona basali ni baana mwa lusika lolu lyangani lo, kubona kuli takazo ya butanya ifetuhile kuba—kuba kalimu kaka lapelwa. Evangelí i kashelizwe kwande kwa neku leliñwi, mapunu mwa keleke ya Laodesia. O Mulimu, ki hola yecwani! Taha, Mulena Jesu, a ku itibahaza Iliwena ku luna. Kakuli lwa li kupa ka Libizo la Jesu.

¹³² Cwale hamunze mu inamisize litoho za mina, meto amina inza itimile, Ni ka mi buza taba yeñwi. Mwa lumela kuli Mulimu utení mo nji? Kana mwa lumela kuli lika Ze ezahala kacenu ki sipolofita se si talelezwa? Kana mwa lumela kuli Jesu Kreste wa swana maabani, kacenu, ni kuyakuile? Kana mwa lumela fani ha Na li fa ni ku iponahaza mwa nama ka lizazi lani, ni misebezi ya

Na ezize kwani, ne i lukela ku kutela mwa lizazi le? Mupolofita na bulezi cwalo. Bibebe i bulezi ona cwalo. Liñolo kaufela li lukela ku talelezwa, ha likoni ku palelwa. Na I tibahalize cwani Yena muñi? Ka kuba Mupolofita yani yana bulezwi ki Mushe. Na zibile likunutu za lipilu za sicaba. Musali na sweli kwa sapalo sa Hae, ki Ha fetuha ni kubulela kuli, "Tumelo ya hao i kupilisize." Fani Simoni Pitrosi hana tile ku Yena, Na zibile libizo la hae, a mu bulelela yo nali yena, ni yo ndatahe nali yena. Mi yena Jesu ya swana yani ya lilato ha si ka shwa, Wa pila kuyakuile. Litumbo lifiwe ku Mulimu! Mi Na lumela, mwa nako ya manzibwana ye cwale, Na lu bizize hamoho hape.

¹³³ O Mulena Jesu, taha mwahala luna. Usike wa lu fitelela. Taha, ina ni luna busihu bo kaufela kufitela busihu bu sa, mi lu kone ku zamaya ni Wena kamuso; lu kone ku Ku ziba mwa mata a zuho ya Hao, kuli lilato la Hao ni muhau ni sishemo likone kuba ni luna. O Mulimu wa Kuyakuile, alaba lika ze. Lu ziba kuli ki Mulimu fela anosi ki yena yakona ku li alaba.

¹³⁴ Mwa tokomelo ya hola ye, lu bulele cwana. Mulimu, Ndata luna, mibili ya luna ki tabernakele ya Hao ye botanile. Kono, Mulena, tuhela kuli muhau wa Hao o kenisa, Moya o Kenile a Hao, utahe cwale. Lu kenise kwa ku kakanyi kaufela ni kwa kufilikana kaufela, ku akaleza kaufela ni buino kaufela wa ku hakanyeha ko kuli ku luna, kuli lu kone ku lukuluha kusina kukakanya ni ko kukana; ku fele, lubulele ka bundume sina Pitrosi kuli, "Ki wena Kreste, ya swana maabani, kacenu, ni kuyakuile."

¹³⁵ Lu lumela kuli Linzwi la Hao ki Niti, Mulena. Halu boneni fela, lu si ka kala kale mukoloko wa litapelo wo, Mulena, itibahaze Iliwena ku luna. Sina ha No bulezi, "Sina mo ne ku bezi mwa mazazi a Lota," fani Abrahama, sikuwata sani sene si bizizwe ni ku libelela mwana wa sepiso, Lota nali kwatasi kwani inza teezea ku bo Billy Graham ba kacenu ni bo Oral Roberts kwa buino bwa likopano bwani kwani, kakuba naha. Kono Abrahama nali muzamai yasina kopano ni iliñwi, neli fela sikuwata se si nyinyani sene si yambaela mwahala naha ya na lukela ku luwa. "Mi baba ishuwile ba ka yola lifasi." Zazi leliñwi, mwataswa kota ya muluti, hane ba sa inzi, ba pumula, Mulimu a shetumuka mwa sibupeho sa Mutu. Mangeloi amabeli aya kwani kwa Sodoma. Mi Mulimu, mwa nama ya butu, apaka kuli Na li cwalo, mi Ali, "Abrahama, uka musala hao, Sarah?" Mazazi nyana kwa mulaho, na bizwa Abrame; ni S-a-r-r-a, Sarra; isiñi Sarah, "mwana mulena wa musali." Mi Wa mu biza ka libizo la hae la mwana mulena wa musali, mwana musizana wa mulena. No bizize Abrahama ka libizo la hae, Abrahama, ndatahe macaba. Mi Wa li, "Ni ka ku potela."

¹³⁶ Mulimu, mo ne itulezi pilu ya mupolofita yani! Na zibile yo Ne uli yena ona fani. Ki kabakaleo ha na tapisize mautu a Hao, atisa lico kaufela za na nani, mi ni zona luli zende, a li beya fa

pila Hao. Na zibile kuli yani neli Mulimu kwani. Mi ki Ha li, “Kana u kai Sarah?” mane inge kuli Na sa zibi. Mi Wa . . .

¹³⁷ Abrahama ali ku Yena, “Uinzi mwa tende . . . uinzi mwa tende, kwa mulaho wa Hao.”

¹³⁸ Mi So bulela sene si ka ezahala. Mi musali, mwa pilu ya hae, a Li kakanya. Mi cwale Wena—Wena wali ku Abrahama, “Kiñi Sarah ha kakanyize sani, mwa pilu ya hae kuli, ‘Lika ze halikoni ku ezahala’? Kikuli kuna ni se sipala ku Mulimu?”

¹³⁹ O Mulimu! Jesu, ya bonahalize Mulimu wa Linzwi, No ize, “Mone kubezi mwa mazazi a Sodoma,” lifasi likaba mwa buino bwani ku sikaba kale sinyeho ya lifasi la Macaba, nako ya ba Macaba. Ki luna ba, Masodoma baba feza! Mi cwale No ize kuli Mwana mutu, ili yo kamita uswanisisa ku ba “mupolofita,” uka patululwa mwa hola yani. Taleleza Manzwi a Hao, O Mulimu. Luna, bana ba Hao baba lumela, lu libelele ka lipilu ze sephahaha, ku lu fa tumelo, Mulena, kuli, halu kaba ni mukoloko wa ku lapelela, batu ba lumele. Seli nako ya manzibwana, Ndate. Tuhela kuli Liseli la manzibwana la Mwana Mulimu (Yena ya Na liteni, ni Yena Ya liteni, mi ki yena Ya ka Taha) aiponahaze Iliyena ka sipolofita sa Ezize. Ka Libizo la Jesu Kreste. Amen.

¹⁴⁰ Cwale fa ni itukisize ku—ku lapelela bakuli. Kono ki taba ye nca, kuli mane halu yema mo. Ki na yo Ni yemi fa cwale ni swabisa nyangela, ni ku swalisana mwahala na ha, kuli Mulimu isali Mulimu. Ha koni kupalelwa. Mi sa Na sepisize, U ka eza. Hana kupalelwa ku si eza, kakuli Na sepisize ku si eza. Kabakaleo Na kona kubeya sepo ku sa Na bulezi. Kabakaleo Ni libelela Kutaha kwa Hae, Ni Mu libelezi kuli abohanale ka nako kaufela, kakuli Na ize kuli, “Mwa hola ye mu sa libeleti,” fo lifasi ha li sa nahani, “kona fa Ka bonahalela.”

¹⁴¹ Cwale, kuya ka mo Ni zibela . . . Ni inzi mwa tabernakele yaka mo, mi kuna ni batu baba nyinyani baba liteni mo bo Ni—Ni ziba. Muzwale Wright, baba nyinyani nyana ba baliteni mo, ona mwahali mo cwale, Na ba ziba. Kono kuna ni babañata ba mina bo Ni sa zibi. Mi ha Ni na mukwa wa kubulela kuli Mulimu uka eza se busihu bwa kacenu. Lu Mu boni ha li eza mwa lilimo ze fitile, kono mwendi Hakoni kueza cwalo busihu bwa kacenu. Hani zibi. Kuitingile ku Yena. Yena ki ya ipitezi. Ueza Sa lata kueza. Hakuna mutu ya kona ku Mu bulelala sa kueza. Upila anosi, mwa tato ya Hae ni muzamao ya Hae. Kono kakuli Na sepisize, Na Mu kupa kuli aeze. Isiñi ka kulata kwa luna, kuli lwa li tokwa, kono mwendi ka bakeñisa muenyi yomuñwi, kuli Moya o Kenile u kone ku toza . . . cwale u lu toze. Cwale, hakuna taba kamba U ka ni toza cwani, Una ni ku mi toza, ni mina, kaniti, kwa ku lumela.

¹⁴² Cwale Ni bata kuba ni mukoloko wa ku lapelela, mi Ni bata ku lapelela bakuli kuya ka mo Ni konela. Cwale, lwa kona kuba ni mukoloko, ku biza batu ni ku ba tisa kwanu, mukoloko wa

tapelo ni ku lapelela mutu kaufela ya kula, Na sepa, ni na ni mizwale ya bakutazi baba ka taha ni na kwanu, mi ba to mi beya mazoho. Kaniti lwa kona kueza sani. Kamba mane lwa kona kukupa Ndata luna, Yali yena Ya kona ku mi ezeza sika kaufela, kakuli mazoho aka ki a mutu fela sina mina baana. Kono taba ya teni ki kuli, ha ki lizoho la butu le li beleka lika; ki Linzwi la Mulimu. Tumelo mwa Linzwi lani kona ye sebeza lika. Hakuna litaba za sayansi ka zona, kaufela zona ha ki za sayansi.

¹⁴³ Hakuna ni haiba sika silisiñwi sa na ni Mukreste mwa buitukiso bwa hae sa lika za sayansi. Kana mwa ziba cwalo? Lilato, tabo, kozo, pilutelele, bunde, kuishuwa, musa, tibelelo, tumelo, Moya o Kenile, lika kaufela ha li bonahali ka sayansi. Mi sani kona sika sa niti mi sa kamita. Lik a kaufela ze mutualima ku zona kuzwa mwa lifasi ni kukuta mwa lifasi. Kono lika ze mu sa koni ku bona ka meto amina, kono ha mu Li bona halinze li i patulula Lona liñi, lani ki lifasi la Kuyakuile.

¹⁴⁴ Kikuli muka lumela, haiba nji Mulimu uka i patulula Iliyena ni ku bonisa kuli Uteni fa wa pila, inza eza lika ze swana za Na ezize kwa simuluho, kasamulaho wa Liñusa le, kana mwakona ku i amuhela kuba foliso ya mina? Mi Mulimu alumeleza cwalo. Cwale Ni kupa kuli mutu kaufela yali mwa tuyaho, hakuna taba kamba ki wena mañi kamba uwzelela kai, Ni mi kupa fela kuli mu lumele ka kutala Liñusa le kuli ki la Niti. Lani kona Liñusa leo Mulimu ana ni mwa Bibele ya Hae ka hola ye, kuli Jesu Kreste uteni mo busihu bwa kacenu mi wa pila. Cwale bukaufi . . .

¹⁴⁵ Mina sicaba kaufela baba ni ziba, Ni teni ona mwa tolopo ye kone Ni hulezi. Na mane hanina nihaiba sikolo sa sikuwa. Yani ki niti luli. Mi mu ni zibile fa nako nyana, Na sepa Ni pilile fapila mina kuli Na sepahala mi ka niti. Hani muipi. Nihaiba basomi baka ba bulelanga ona cwalo. Bona, ba bulelanga fela kuli, "Wena—wena ha u muipi, kono wa fossa. U fossa ka kusa ziba, isiñi ka kulata." Na hanisepi kuli Ni na ni mulatu ka ku sa ziba, kakuli Linzwi la Mulimu la pakela Liñusa laka, mi Li lukela ku mi bulelela Yo lili Lona. Mi mwa ni utwanga hande ha Ni bulela kuli ha ki na, kacwalo he I lukela kuba Yena. Ki niti yeo? Mube ni tumelo ku Mulimu he. Mutualime kwa neku le, mi mu lumele Mulimu. Haiba mwa kona ku lumela Mulimu, Mulimu uka mi alaba. Haiba Wa kona kueza cwalo sina Ha kile a eza sapili, konakuli Usali Mulimu. Mwa lumela cwalo?

¹⁴⁶ Mwa lumela sani? Kalibe ya inzi kwanu fapila ka, inza ni talimela, mioko mwa meto a hae, ka ku sepahala. Ha ni zibi kuli ki mañi, ha ni si ka mu bona kale. Ni muenyi ku yena. Kana wa nahana kuli Mulimu wa ziba kunutu ya pilu ya hao, litakazo za hao, kamba sibi sa hao, kamba seo kaufela sili sona? Unahana kuli Wa ziba? Unahana kuli Wa kona ku patulula ku na seo sibi sa hao sili sona, so ezize, so no lukela kueza, kamba takazo ya hao, seo kaufela sili sona? Haiba nji Wa kona ku si eza, kikuli si ka kueza kuli u Mu lumele, wa ziba kuli i lukela kuba Yena? Kikuli

uka amuhela kuli ki Yena? Ha ki sibi sa hae se si ku kataza; u ipulezi kale sani. Kono ubata kolobezo ya Moya o Kenile wa Hae. Uka I amuhela. Ni U boni ha ushetumuka fahalimwa hae.

¹⁴⁷ Kuli mukone kuziba kuli Ne ni sweli kutalima musali yani, na sweli kutalima ku na, Ni bata ku mi bonisa Moya o Kenile. Mutualime kwanu, ona fa ku musali yomunyinyani ya inzi fa, kwatasa mautu aka kwanu. Hane Ni bulezi sani, kona taba yeswana ya bata, ki kolobezo ya Moya o Kenile. Wa lumela kuli uka U amuhela, kezeli? Nanula lizoho la hao mwa halimu, kanti. Nali kuba ni mubone musali yo mwa bupilo bwaka, ka kuziba.

¹⁴⁸ Mwa bona muuna ya inzi fa ni toho ya hae fafasi, ya inzi ona fani, ni kola ya hae ye mu cepeta, ni zeñwi cwalo. Una ni butata bwa sinya. Wa lumela kuli Mulimu uka ku bisa hande? Nanula lizoho la hao mwa halimu haiba uka I amuhela. Ku lukile, Mulimu aku alabe kupo ya hao.

¹⁴⁹ Mutangana yo ya inzi fa, ubata kolobezo ya Moya o Kenile. Wa lumela kuli Mulimu uka kufa Ona; muñaka, wena yana ni tai ye sweu ye lepelela kwa mulaho? Mulimu uka lumeleza cwalo.

¹⁵⁰ Muuna yo fa u lapelela musala hae. Uinzi mwa sibaka sa baba lyangani. Kana wa lumela kuli Mulimu uka mu folisa, ku mueza kuba hande? Wa lumela cwalo? Wa kona kuba ni sona.

¹⁵¹ Wena ya beile lizoho la hao fa mumizo wa hao, wa lumela kuli Mulimu wa kona kufolisa butata bwa pilu bo bu ku kataza, ona butata bwa mwa mba bo nani bo? Uinzi foo, wa kula ona fa. Ki niti yeo? Wa lumela kuli Wa ku folisa? Konakuli wa kona ku ba ni yona. Amen.

¹⁵² Mwa bona kuli Wa swana maabani, kacenu, ni kuyakuile. Mubuze batu bani, mubone haiba Na ba ziba. Hani ba zibi, kono Yena wa ba ziba. Amen. Mwabona Liseli lani kwa matuko a limota kwa buse, lisweli ku lepelela fahalimwa muuna ya inzi fani. Usweli ku katazwa ki butata bwa moongola mwa mukokoto wa hae. Ha zwi kwanu, u zwa kwa Georgia. Bo Duncan, mwa lumela ka pilu yamina kaufela, Mulimu uka folisa butata bwa pilu bwani. Mwa lumela ka pilu ya mina kaufela? Mulimu ami fuyole.

¹⁵³ Ki yo fa muuna ya inzi kwa mulaho kwanu, ni butata bwa mukokoto, inza ni talima. Hani mu zibi, kono muuna muhulu Bo Thompson. Mwa lumela? Muyeme muñaka, sha, kwa mulaho ka foo, ili kuli... Ni muenyi ku mina. Yani ki niti. Kono muinzi foo, mwa lapela. Butata bwa hao bwa mukokoto bu folisizwe cwale. Jesu Kreste wa ku eza hande.

¹⁵⁴ "Ku kaba Liseli kwa nako ya manzibwana." Kana ha mu boni, Utensi mo busihu bwa kacenu! Ki yena yomutuna Yaliteni. Ki ya swana maabani, kacenu, ni kuyakuile. Kana mwa lumela cwalo? Kikuli mwa lumela ni ku ikolwisisa kuli yo ki Jesu Kreste ya sweli ku itibahaza Iliyena, ku iponahaza Iliyena mwa sipolofita?

¹⁵⁵ Usike wa bilaela ka liito. Mulimu wa folisa baba kula ni baba nyandile.

¹⁵⁶ Ki batu babakai bao . . . Ki babakai babali mwahali mo, baba kula? Halu boneni mazoho amina. Ku bonahala fela kuli ki kuhoha ni kuhamula. Kana yomuñwi wa mina sicaba kuna ni yana ni kadi ya tapelo? Hanizibi mo Ni kona ku mi tiseza kwanu. Ni bata ku mi lapelela, mi ha Ni zibi mwa ku ezeza. Mwa bona kana, mutualime kwa limota, Ni ka batusa cwani kuli bafite kwani? Kucwani haiba mu ka kakatela kwa neku leliñwi? Muna ni ya tibezwi ona fo, mutu kaufela ayeme a kuzize.

¹⁵⁷ Muteeleze, mu ni utwe. Kana Ni kile na mi bulelela sika kaufela ka Libizo la Mulena kono kwanda se si ezahalile? Kana ki niti yeo? Lika kaufela libile hande kamita. Hani si ka mi kupa kale nihaiba pene iliñwi mwa bupilo bwaka, Ni kile na kupa nji? Hakuna nihaiba nako iliñwi. Nali kuba ni amuhele neo mwa bupilo bwaka. Ha ni yo mo bakeñisa masheleñi. Ha ni yo mo ku to mi puma. Niteni mo ku to bonahalisa Linzwi la Mulimu la hola. Ni mi bulelezi Niti, ni Mulimu upakile kuli ki Niti. Cwale Na mi bulelela, KISONA SA BULELA MAÑOLO, kuli haiba mulumeli abeya mazoho fahalimwa bakuli, Jesu naize, “Ba ka foliswa!” Kikuli mwa lumela cwalo? Konakuli, fa Pila Mulimu, kana ha mu lumeli kuli Uka eza cwalo ona fa?

¹⁵⁸ Cwale mubeye mazoho amina ku yomuñwi ni yomuñwi, mi mu libelele fela fa muzuzu. Cwale, musike—musike mwa lapela, mu kambeke fela mazoho amina ku yomuñwi ni yomuñwi; kwande kafo mwa naha. Mi na, kasibili, Ni kambeka fahalimwa litaulo ze. Cwale Ni bata kuli mu ni talime fa muzuzu fela. Ki sikamañi seo Mulimu asiile se si sika ezahala? Mutualime ka Mwa inezi, seo Linzwi le lu balile, sipolofita se lu bulezi, kuli Jesu na itibahalize Iliyena ka sipolofita. Cwale mutualime kwa hola, mi lisunda zetalu ze fitile ze ko lu tomile hola ye lupila ku yona. Mutualime se lu bala, kucwani he ka bapolofita ba buhata mane ni lisupo ze ka puma ni bona baba ketilwe. Kamo Linzwi li bonahalezi, kamo mulimu wa lusika lo afoufalize ka buhata . . . lipilu za batu. Ni mane kuli Mulimu Kasibili abulezi kuya ka sipolofita sa Hae kuli lika ze ne lika ezahala mwa Lusika lwa Laodesia. Hakuna se si siyezi ku ezahala. Mulimu uteni mo sina yena Mulimu yana ambozi kwa batu bani kwa Emausi, sani ne si Mu zibahalize ka sipolofita sene si bulezwi ka Yena, Utensi mo busihu bwa kacenu unza bonahaza Kubateni kwa Hae ka sipolofita se ne si bulezwi ka lusika lo. Yena wa swana maabani, kacenu, ni kuyakuile. Kana mwa lumela nji? Konakuli mu beye mazoho amina fahalimwa yomuñwi ni yomuñwi. Musike mwa itapelela mina bañi, kono ka nzila ya mina fela mu lapelele mutu yani ye mu kambekile mazoho, kakuli wa mi lapelela. Cwale mutualime, musike mwa kakanya.

¹⁵⁹ Mi cwale kambe mwakona kubona se Ni talima! Mi muziba kuli ha Ni koni ku mi puma, ninze ni yemi fa. Kambe mwakona

kubona, ni tumelo ya mina i hohe Moya o Kenile o mutuna wani onoli mwa halimu mwa moya—moya, o sayansi inani maswaniso a zona, ni ku Si bona ha si zamaya mwa tuyaho wo kulika fela kufumana sibaka sa—sa kulula fateni, kulika kufumana sibaka sa mayendameno. Ki ku Si lumela fela, muzwale waka. Yena uli zibahalisa kale ka Mañolo ni zeñwi cwalo, yani ki niti. Cwale mulapele ka ku sepahala ka mutu yo mubeile mazoho yo; wa mi lapelela.

¹⁶⁰ Jesu Yomunde wa Nazareta, kiñi, lwa tokomela, Mulena, ka Linzwi, la kuli Utensi mo, ka sepiso yakuli Utensi mo, “Kaufela koku kopani bababeli kamba babalalu mwa Libizo la Ka, mwahala bona Ni mwateni. Mi lisupo ze lika latelela baba lumela; haba ka beya mazoho fa bakuli, ba ka foliswa.” Kwande mwa mihala ya luwaile lo, Moya o Kenile omutuna uye mwa puteho kaufela. Mo lona Liseli leliswana leli Kenile le lu talimezi ona mo mwa keleke, ha Li we fahalimwa mutu ni mutu, mi ha bafoliswe ka nako ye. Lwa kalimela sila, yena diabulosi, mwa Kubateni kwa Kreste; lu li kwa sila, kuli utuzwi ka—ka manyando a kwahule, ona lifu la Mulena Jesu ni zuho ye mata ka zazi la bulalu; ni bupaki bwa Hae bo bu bonahalile bwa kuli Utensi mwahala luna busihu bwa kacenu, wa pila, kasamulaho wa myaha ye mianda ye naintini. Lumeleza kuli Moya wa Mulimu yapila utale mwa pilu kaufela ka tumelo ni mata, ni mata a foliso a zwelela kwa zuho ya Jesu Kreste, Yena ya zibahaliswa cwale ka Liseli lelituna le lisweli kupotoloha mwa keleke, mwa Kubateni kwa Hae. Ka Libizo la Jesu Kreste, lumeleza cwalo kwa kanya ya Mulimu.

¹⁶¹ Mi he litaulo ze lu lapelela ze, likone ku ya kwa bakuli ni baba zielehile ko li lukela kuya. Mi ona Moya o Kenile oswana osweli ku itibahaza ili Ona, unzo itibahaza Ona uñi ku mukuli kaufela ye li ka beiwa ku yena. Mi Kubateni kwa Mulimu utaze lipilu za bona ka tumelo konji matuku a mibili ya bona haka foliswa. Lwa li kupa, kwa kanya ya Mulimu, fapila Kubateni kwa Jesu Kreste mi ni ka Libizo la Jesu Kreste, luna batanga ba Jesu Kreste halunze lu kupa. Amen.

¹⁶² Cwale kuzwa mwa lipilu za mina, Hanina taba kamba ki sikamañi sene si fosahalile ku mina, mwa kona, kuzwa mwa lipilu za mina, ku lumela mwa lipilu za mina kuli Linzwi la Mulimu li mi alabile likupo za mina? [Puteho ili, “Amen.”—Mu.] Ni lumela kuli lizoho kaufela, mo Ni kona ku bonela, a nanuhile. Haiba mwa lumela cwalo, cwale muhupule, ku felile.

¹⁶³ Mina kwande kafoo fa mihala ya mawaile, haiba mu lumezi ka lipilu za mina kaufela, bakutazi habanze ba beya mazoho fahalimwa mina, ni balatiwa ba mina banze ba beya mazoho fahalimwa mina, haiba mwa lumela ka lipilu za mina kaufela kuli ku felile, ku felile. Ona Moya o Kenile o mutuna, Utensi mo mwa tabernakele busihu bwa kacenu. Ni Mu boni ha zamaya fahalimwa sicaba, u iponahalize Iliyena fani kwa neku la limota,

ni ku shetumukela ku muuna, kutaha cwalo mo ni ku kambama mwahala muyaho, unzo zibahaza likunutu za lipilu, zibahazo ya Kubateni kwa Hae, ku bonisa kuli Wa swana maabani, kacenu, ni kuyakuile. Uteni mwahala luna! Yena ki Mulimu, yena Mulimu ya sa palelwi sika.

¹⁶⁴ Mi kana lipilu zaluna ne li sa tuki mwahala luna, mi kana ha li tuki mwahala luna cwale, ka kuziba kuli cwale luinzi mwa Kubateni kwa zuho ya Jesu Kreste, ku Yena kube kanya ni tumbo kuyakuile; Yena yali mwa sibupeho se si bonahala sa Jehova Yamata; Yena yana shetumukile mwa mufuta wa Siita sa Mulilo mwa sicacani se si tuka mulilo, kuli aebelelise ngana ya mupolofita; Yena yana tulukile fa halimwa lilundu, mi mutu kaufela yana ka swala fela kwateni na ka bulaiwa, kwanda Mushe ni Joshua. Mone ku bezi kuli Na zamaisize bana ba Isilaele mwa lihalupa, mwa musipili wa bona, kakuba mufuta wa sicaba se si biziwe sa kacenu. Ki yo Uteni fa, ka lipatisiso za sayansi, mane nihaiba kuiponahaza Iliyena fapila sayansi. Ni ka likezo za Hae ni ka sipolofita sa Hae luli, lika ze polofitilwe ka Yena kuli liezahale mwa lizazi le, ku Mu panga kuba ya swana maabani, kacenu, ni kuyakuile, libile ze pakilwe hande. Kana ha ki zeñata kuli li cise lipilu zaluna mwahala luna? Mulimu ami fuyole.

¹⁶⁵ Cwale mwa buñwi, ha lu yemeni lubulele kuli: Cwale ni amuhela Jesu Kreste sina Mupulusi ni Mufolisi. [Puteho ili, “Cwale ni amuhela Jesu Kreste sina Mupulusi ni Mufolisi.”—Mu.] Mi ka muhau wa Hae, [“Mi ka muhau wa Hae,”] kuzwa hola ye kuya kwapili, [“kuzwa hola ye kuya kwapili,”] O Mulimu, [“O Mulimu,”] usike wa tuhelela ku sa lumela kaufela [“usike wa tuhelela ku sa lumela kaufela”] kuli kukene mwa pilu yaka, [“kuli kukene mwa pilu yaka,”] kakuli Ni boni [“kakuli Ni boni”] sipolofita [“sipolofita”] sa lizazi le [“sa lizazi le”] kutalelezwa. [“kutalelezwa.”] Na lumela [“Na lumela”] kuli Jesu Kreste [“kuli Jesu Kreste”] wa pila [“wa pila”] mi fa cwale [“mi fa cwale”] inza paka Linzwi la Hae [“inza paka Linzwi la Hae”] la hola ye. [“la hola ye.”] Ona bupolofita [“Ona bupolofita”] bone bu ñozwi ka Yena [“bone bu ñozwi ka Yena”] bu talelelizwe cwale mwahala luna. [“bu talelelizwe cwale mwahala luna.”] Ki yena Mupulusi wa ka, [“Ki yena Mupulusi wa ka,”] Mulimu wa ka, [“Mulimu wa ka,”] Mulena ka, [“Mulena ka,”] yena Linto-kamukana-kuna. [“yena Linto-kamukana-kuna.”]

¹⁶⁶ Mulimu yomunde, utwa bupaki bwa luna. Mi ufe ku luna, zazi ni zazi, Sinkwa sa Bupilo. Mi lwa Kufa tumbo kaufela, O Mulimu, kuzwa mwa butungi bwa lipilu za luna. Lwa Ku lumba, wena Ya Mata, wena Mulimu wa bapolofita. Ka Libizo la Jesu Kreste. Amen.

Oh, ki kolo yecwani, ki nako ye cwani!

. . . kulumela fela;
 Kulumela fela, ku lumela fela,
 Lika kaufela za konahala, kulumela fela.

Halu i opeleñi cwana.

Cwale Na lumela, oh, cwale Na lumela,
 Lika kaufela za konahala, cwale Na lumela;
 Cwale Na lumela, oh, cwale Na lumela,
 Lika kaufela za konahala, cwale Na lumela.

Kana kona bupaki bwa mina bo nji? [Puteho ili, “Amen.”—Mu.] Cwale halunze luinamisa litoho zaluna.

Mu ta lu kopana! mu ta lu kopana!
 Mu ta lu kopana kwa mautu a Jesu;
 Mu ta lu kopana! mu ta lu kopana!
 Mulimu abe ni mina kufita lu kopana hape!

[Muzwale Branham ukala ku ūnuñuna *Mulimu Abe Ni Mina*, kasamulaho uambola ku Muzwale Neville—Mu.] Kikuli ubata ku bulela sika? Vayle.

. . . kwa mautu a Jesu;
 Mu ta lu kopana! mu ta lu kopana!
 Mulimu abe ni mina kufita lu kopana hape!

¹⁶⁷ Ni litoho zaluna ze inami, Muzwale Vayle uyemi fa kuli alu lukulule ka tapelo. Muzwale Lee Vayle, ki muñoli wa mwa tabernakel kwanu, wa litaba ni libuka, ni zeñwi cwalo. Ki muzwale yomunde hahulu, ubile ni na mwa mikopano yemiñata hahulu. Ni lakaza kuli kambe Ne ni kaba ni kolo ya ku lumeleza mukutazi kaufela, ku ba tisa fa katala fa ni ku ambola ku bona. Mwa utwisia, Na sepa. Mukutazi kaufela, lu tabile fa kuba ni mina mo. Keleke kaufela, sicaba sa likeleke ze shutana, kaufela, lu tabile kuba ni mina mo. Mi kaniti ki tapelo ya luna ku yomuñwi ni yomuñwi, “Mulimu abe ni mina kufitela lu kopana hape.” Ka litoho zaluna ze inami, ni mazoho a luna a nanuhile, halu i opeleñi hape ha munati ku Mulimu.

Muta lu kopana! muta lu kopana!
 Mu ta lu kopana kwa mautu a Jesu!
 Mu ta lu kopana! mu ta lu kopana!
 Mulimu abe ni mina kufita lu kopana hape!



LIKEZAHALO LIBONAHALISWA HANDE KA S IPOLOFITA LOZ65-0801E
(Events Made Clear By Prophecy)

Liñusa le ka Muzwale William Marrion Branham, neli katalizwe lwa pili mwa Sikuwa la Sunda manzibwana, Muyana 1, 1965, ili fa Branham Tabernacle mwa Jeffersonville, Indiana, U.S.A., iingilwe kuzwa fa tepu ya magesi ya manzwi ni ku hatisiwa kusina kuzusa sika mwa teni kuya Sikuwa. Toloko ye ya mwa Silozi nei hatisizwe ni ku hasanyiwa kiba Voice Of God Recordings.

LOZI

©2017 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Zibiso ya bahatisi

Litukelo kaufela li bulukilwe. Buka ye yakona kupulintwa fa pulinta ya mwa ndu kuli iitusiswe ki mutu kamba kuli ifiwe ku yomnwi, mahala feela, kakuba siitusiso sa ku hasanya Evangelí ya Jesu Kreste. Buka ye hailekiswi, kuatiswa mwa buńata, ku nepelwa fa moyá wa webusaiti, ku bulukwa mwa mukwa wo bunolo, ku tolokwa mwa mishobo isili, kamba ku itusiswa kwa kukupa masheleńi ku sina tumelelano niba Voice Of God Recordings®.

Ka litaba zeńata kamba ka libuka zeńwi ze liteni, shangwe muńolele kwa:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org